

Ri carta ri xutz'ibaj ri apóstol San Pablo chique ri quiniman ri Jesucristo pa tinamit Roma

Ri apóstol Pablo nutak-e qui-saludo ri quiniman ri Jesucristo

1 ¹Yin Pablo jun rusamajinel ri Jesucristo, xinoyox richin xinoc apóstol y yin cha'on^a richin nintzijoq ri utzulaj ch'abel rutakon-pe ri Dios ri nu'ij achique ruchojmil yecolotaj ri vinak. ²Ri utzulaj ch'abel re' can ruyo'on-vi-pe rutzijol chi nuya-pe, y ja ri ru-profetas erucusan-pe richin quiyo'on-pe rutzijol^b chupan ri lok'olaj ruch'abel ri quitz'iban can. ³Ri utzulaj ch'abel re', nuk'alajrisaj ri Ruc'ajol ri Dios chikavech, ri Kajaf Jesucristo. Rija' xalex choch'ulef achel nkojalex konojel, y riy-rumam can ri rey David.^c ⁴Pero man xe ta rumam can ri rey David, roma riq'uin ri xc'astaj-e chiquicojol ri anima'i'^d riq'uin ruchuk'a' ri Lok'olaj Espíritu, xk'alajin chi can Ruc'ajol vi ri Dios. ⁵Y roma ri Jesucristo tok ri Dios ruyo'on ru-favor chike, richin roj ocunak apóstoles.^e Quiri' xu'on, richin quiri' ri pa tak tinamit pa ruvi' ri roch'ulef, can ta ec'o niquic'uaj ri quic'aslen achel nuc'ut ri utzulaj ch'abel ri cukul kac'u'x riq'uin, richin chi ninimirises rubi'. ⁶Y chiquicojol rije' rixc'o rix aj-Roma, ri rix oyon^f richin xixoc richin ri Jesucristo. ⁷Chive chi'ivonojel ri rixc'o pa tinamit Roma nin-en-vi-e ri vuj re', rix ri yixrojo' ri Dios, ri rix oyon richin rix ocunak lok'olaj rutinamit. Ri favor y ri uxlanan ri nipe riq'uin ri Katata' Dios y ri Ajaf Jesucristo can ta xtic'uje' pan ivánima.

^a 1:1 Gá. 1:15. ^b 1:2 Ro. 3:21; 16:26. ^c 1:3 Mt. 1:1. ^d 1:4 Hch. 13:33. ^e 1:5 Ef. 3:8.
^f 1:6 1 Co. 1:2.

Ri Pablo nurayij ye'erutz'eta' ri quiniman ri Jesucristo pa tinamit Roma

⁸Na'ey ninya' matiox che ri Dios ivoma rix,^g chi pa ruvi' ronojel ri roch'udef benak-vi rutzijol chi rix iyo'on ivánima riq'uin ri Jesucristo ri achok roma (napon, nebos) ri matioxinic re' chuvech ri Dios, ⁹ri yin ocunak rusamajinel riq'uin ronojel vánima, richin nintzijoj ri utzulaj ch'abel ri ruc'amon-pe ri Ruc'ajol. Ri Dios reteman chi man jun bey yitane' chi yixinc'uxlaj pan oración.^h ¹⁰Ninc'utuj che chi can ta xtrojo'ⁱ chi man ta chic c'o xtoc chupan chi yixentz'eta'. ¹¹Roma yin ninrayij chi nikatz'et chic ki' iviq'uin richin yixinto', richin quiri' c'o che ri nuya' ri Lok'olaj Espíritu xtic'ul, richin más nicuker ivánima riq'uin ri Jesús. ¹²O más utz nin-ij chi nikaya' ruchuk'a' ri kánima, riq'uin nikatzijoj chikavech ri achique kilon riq'uin ri Jesucristo roma cukul kac'u'x riq'uin rija'.

¹³Pero yin ninjo' chi rix nivetemaj chi yin man xe ta jun bey nunojin chi yixentz'eta',^j pero c'a chupan ri k'ij re' c'o k'atayon vichin.^k Can nurayij ri vánima chi yixinto' richin quiri' ja jun chi'icojol rix c'o utz ntel-pe che ri nusamaj, achel elenak-pe quiq'uin ri ch'aka' chic man israelitas ta. ¹⁴Yin, yin achel jun aj-c'as'^l quiq'uin ri yech'o griego y quiq'uin ri man yech'o ta griego. Quiri' mismo quiq'uin ri q'uiy queteman y ri man jun oc queteman. ¹⁵Romari' tok ja jun pan itinamit rix aj-Roma nurayin chi yin benak-vi chutzijosic ri utzulaj ch'abel ri nu'ij achique ruchojmil yecolotaj ri vinak.

Ri utzulaj ch'abel ri nu'ij achique ruchojmil yecolotaj ri vinak, can ruchuk'a' vi ri Dios

¹⁶Roma yin man yiq'uix ta nintzijoj ri utzulaj ch'abel ri nu'ij achique ruchojmil yecolotaj ri vinak, roma ri ch'abel ri' can ruchuk'a'^m vi ri Dios richin yecolotaj ri niquiya' cánima riq'uin ri Jesucristo. Ri ch'abel ri' na'ey xyo'ox rutzijol chique ri israelitas, pero (chuka', ka) xyo'ox chique ri man israelitas ta. ¹⁷Ja utzulaj ch'abel ri' nik'alajrisan achique nu'on ri Dios richin man jun kamac nikakalej chuvech. Nu'ij chi ri nuya' ránimaⁿ riq'uin ri Jesucristo, manak chic mac nrakalej. Re' ruyuken-ri' riq'uin ri tz'iban can, ri nu'ij; Ri man jun mac rakalen chuvech ri Dios, nril ri c'aslen ri richin jumul, roma cukul ruc'u'x chi ri nusuj ri Dios, can xtiyo'ox-vi che.

^g 1:8 Fil. 1:3. ^h 1:9 Ef. 1:16; Fil. 1:3, 4; 1 Ts. 1:2; Flm. 4. ⁱ 1:10 Ro. 15:32.

^j 1:13 Ro. 15:23. ^k 1:13 1 Ts. 2:18. ^l 1:14 1 Co. 9:16. ^m 1:16 1 Co. 1:18; 2 Co. 10:4; 2 Ti. 1:8. ⁿ 1:17 Hab. 2:4.

Ri quimac ri vinak chuvech ri Dios

¹⁸Ri royoval ri Dios,^o c'a chila' chicaj catajnak-vi-pe chirij ronojel ri quibanalo'n ri vinak ri nic'utu chi xa manak Dios pa quivech, y man quic'uan ta jun choj c'aslen. Roma rije' quik'aton chuvech ri kitzij riq'uin ri man choj ta c'aslen quic'uan. ¹⁹Quiri' nika'ij, roma ri achique ruchojmil navetemaj chi c'o Dios,^p rije' k'alaj chiquivech, roma ri Dios ruk'alajrisan chiquivech. ²⁰Roma xe tok xc'uje' ri roch'udef, ri man nitz'etetaj ta che ri Dios, k'alaj chikavech roj vinak. Jabel nik'alajin chi rija' can Dios vi^q y c'o ruchuk'a' ri man jun bey niq'uis. Y ja ri rubanon ri Dios choch'udef^r nik'alajrisan quiri' chikavech. Romari' manak che'el chi ri vinak quire' niqui'ij: Roj man jun kamac, roma man jun x-in chike chi c'o Dios. ²¹Roma rije' queteman chi c'o Dios, pero man xquiya' ta ruk'ij masque can Dios vi,^s ni man xquiya' ta matiox che, xa ja ri man jun rakale'n xequinojij; y jari' xbanó chi xa xk'uk'umer ri cá'nima y xenacano-ka. ²²Rije' riq'uin ri niqui'ij chi can c'o queteman, jari' xbanó chi xenacano-ka.^t ²³Mana-ta ri Dios ri jumul c'o ruc'aslen ri xquicha' richin niquiya' ruk'ij,^u xa vinak niq'uis quic'aslen, chicop c'o quixic', chicop cajcaj cakan y cumatz xequicusaj chi tiox richin xquiya' quik'ij.^v

²⁴Romari' ri Dios xerosk'opij^w chupan ri c'aslen man utz ta^x ri niquirayij pa cá'nima. Roma c'a ri', xequibanala-ka mac^y chiquivech; xquiyala-ka chi nimalaj q'uix ri qui-cuerpo.^z ²⁵Pa ruq'uexel chi xquitzele'ej ri kitzij richin ri Dios, xa ja ri man kitzij ta xquitzele'ej.^a Ja ri rubanon ri Dios ri xquiya' ruk'ij pa ruq'uexel ri Dios ri can nuc'ul-vi chi niyo'ox ruk'ij richin jumul.^b Amén.

²⁶Y roma ri quiri' yequibanala', ri Dios xerosk'opij can chupan ri nurayij ri cuerpo ri xa nuya' q'uix.^c Roma hasta ri ixoki' chiquicojol man quic'uaj ta chic pa ruchojmil ri quic'aslen, xa chi ixoki' xquic'amala-ka-qui' chiquivech, y man chic xecajo' ta achi'a'. ²⁷Quiri' mismo xqui'en ri achi'a', c'o ri man chic xecajo' ta ixoki', xa chi achi'a' man xquik'at ta chic qui', chiquivech xequibanala-ka itzel tak mac ri nuyec q'uix.^d Y roma ri itzel tak mac ri yequibanala', ja yan ri qui-cuerpo nik'asan-e ri castigo ri can utz vi chi nika pa quivi', roma man pa ruchojmil ta niquinojij chirij ri Dios.

²⁸Y roma pa quivech rije' manak nic'atzin-vi ri Dios, rija' xerosk'opij chupan ri itzel tak no'oj ri niquinojij, richin yequibanala-ka ri man utz ta

^o 1:18 Col. 3:6. ^p 1:19 Hch. 17:24. ^q 1:20 Hch. 14:17; 17:24-27. ^r 1:20 Job 12:7-10; Sal. 19:1; Jer. 10:12. ^s 1:21 2 R. 17:15. ^t 1:22 Jer. 10:14. ^u 1:23 Sal. 106:20.

^v 1:23 Dt. 4:15-19. ^w 1:24 Hch. 7:42. ^x 1:24 Ef. 4:19. ^y 1:24 Lv. 18:22; Sal. 81:12.

^z 1:24 1 Co. 6:18. ^a 1:25 Jer. 10:14. ^b 1:25 Ro. 9:5. ^c 1:26 Gn. 19:5. ^d 1:27 Lv. 18:22; 1 Co. 6:9.

chi ye'an. ²⁹Ruyon man choj ta ri yequibanala'. Niquicusaj ri qui-cuerpo richin yec'uje' xa achok riq'uin na. Ejaloy ruchojmil ri utz. Benak cánima pa ruvi' méra. Niquibanala' itzel tak no'oj. Jani na nikukut cánima chiquij ri utz ec'o. Ecamisanel. Jani na oyoval niqui'en. Jani na niquisetz no'oj. Niquicanoj rubeyal niqui'en itzel chique ch'aka'.^e ³⁰Yejasloj chiquij ch'aka' chic. Niquikasaj quik'ij vinak. Itzel niqultz'et ri Dios.^f Niqui'ij tzij chiquipalaj ch'aka' chic. Man jun cakale'n niqui'en chique ch'aka'. Niquina-qui' chi can c'o quik'ij. Ri cánima benak pa ruvi' achique ta chic jun mac niqultz'uc-pe. Man niquinimaj ta quitzij quite-quitata'.^g ³¹Man nicajo' ta yech'abex. Man niqui'en ta ri niquisuj. Nis-ta ri (calpachel, caj-c'uaxel) yecajo'. Man jun nik'ilo coyoval, y man yepokonan ta.^h ³²Rije' queteman chi ri yebano riⁱ achel xka'ij yan ka, ri Dios pa ruchojmil rubanon chi ruk'aton can camic pa quivi', pero rije' man xe ta quiri' niquibanala', xa yequicot chi ec'o chic ch'aka' ri quiri' yebano.

Ri Dios xtuya' rajil-ruq'uexel ronojel pa ruchojmil

2 ¹Roma c'a ri', rat ri na'ij chi man utz ta yetajin ri yebano mac, ri quiri' na'ij, man yaruto' ta richin natzel can ru-castigo ri Dios, xa ayon rat mismo navoyoj-ka castigo pan avi', roma ja jun rat c'o chique ri mac ri' yatajin riq'uin.^j ²Roj keteman chi conojel ri yebano mac achel ri xka'ij yan ka chive, ri Dios can nuya-vi rajil-ruq'uexel chique,^k y can pa ruchojmil nuya'. ³Romari' rat ri na'ij chi man utz ta yetajin ri yebano mac achel ri xka'ij yan ka, pero xa ja jun rat quiri' yatajin riq'uin, man c'a tanojij chi ri Dios man xtuya' ta rajil-ruq'uexel ri amac.^l ⁴Rat achel xa manak rakale'n na'an che ri nimalaj rubeyomal ri Dios, chi utz runo'oj aviq'uin, chi rat rucoch'on^m y chi q'uiy tiempo man k'axnak ta ruc'u'x riq'uin ri man utz ta ri yatajin. Achel xa man ta aveteman chi ri utzulaj runo'oj aviq'uin, xa richin nrojo' chi rat najal ano'oj y naya' can ri mac.ⁿ ⁵Rat xa cof abanon che ri avánima. Man najo' ta najal ano'oj richin naya' can ri mac. Y riq'uin ri', namol-apu royoval ri Dios chavij, richin nika pan avi' chupan ri k'ij richin ri royoval,^o tok xtik'alajin ri chojmilaj rutojic xtu'on ri Dios che ri yatajin riq'uin. ⁶Roma ri Dios ja achel ri achique yekabanala' chikajununal, quiri' ri rajil-ruq'uexel xtuya' chike.^p ⁷Ri man yetane' ta richin niqui'en ri utz,^q roma niquirayij chi nic'uje' quik'ij, y chi ri Dios utz xtu'on chique y chi niquil jun c'aslen ri manak camic ruc'uan,^r rija' xtuya' c'aslen ri richin jumul chique.^s ⁸Jac'a ri niquipaba-qui' chuvech ri Dios, y pa ruq'uexel chi niquinimaj ri kitzij

^e 1:29 Gá. 5:19-21. ^f 1:30 Dt. 7:10. ^g 1:30 2 Ti. 3:2. ^h 1:31 2 Ti. 3:3. ⁱ 1:32 Ro. 6:21.

^j 2:1 Mt. 7:1, 2. ^k 2:2 1 Ts. 4:6. ^l 2:3 Pr. 11:21. ^m 2:4 Ex. 34:6. ⁿ 2:4 2 P. 3:9.

^o 2:5 Jud. 6; 2 Ts. 1:5. ^p 2:6 Mt. 16:27; Sal. 62:12. ^q 2:7 1 P. 1:7. ^r 2:7 Mt. 25:46.

^s 2:7 Jud. 21; He. 10:36.

ruch'abel, xa yequibanala' ri ru'in^t ri Dios chi man choj ta, can xtuya' na vi nimalaj royoval pa quivi'.⁹ K'axomal y ralal ri c'ayef xtuya' pa ruvi' xa achique na ri nibano ri man utz ta. Quiri' xtu'on ri Dios na'ey quiq'uin ri israelitas, y quiq'uin ri man israelitas ta. ¹⁰Jac'a ri nibano ri utz, ri Dios xtu'on chi xtec'uje' chupan ri nimalaj sakil, chi xtic'uje' ruk'ij, y chi nuxlan ri ránima. Quiri' xtu'on na'ey quiq'uin ri israelitas, y quiq'uin ri man israelitas ta, ¹¹roma rija' xa junan nkurutz'et^v chi nimalaj konojel.

¹²Roma conojel ri xebano mac y manak ri ley ri xyo'ox che ri Moisés quiq'uin, can xtika na vi ri camic ri richin jumul pa quivi', pero mana-ta ri ley xticuses chiquij. Jac'a ri israelitas ri xebano mac y xa c'o ri ley ri xyo'ox che ri Moisés quiq'uin, ja ri ley ri' xticuses chiquij richin niyo'ox castigo pa quivi'. ¹³Roma mana-ta ri xe niqic'axaj ri nu'ij ri ley, xa ja ri yebano ri nu'ij^w ri man jun quimac nicakalej chuech ri Dios, ¹⁴Roma ri man israelitas ta, tok ja ri cánima ni'in-pe chique chi tiquibana' achel nu'ij ri ley ri xyo'ox che ri Moisés, masque manak ri ley ri' quiq'uin, can nik'alajin chi c'o jun ley pa cánima, y jari' ni'in-pe chique achique ri utz y achique ri man utz ta. ¹⁵Achel can ta tz'iban ri ley ri' pa tak cánima, y ja ri cánima ni'in-pe chique achique ri utz y achique ri man utz ta. Utz nuna' ri cánima tok niq'u'en ri utz, y nik'axo cánima tok man niq'u'en ta ri utz. ¹⁶Y ri Dios ja ri Jesucristo xtucusaj richin xtuya' rajil-ruq'uexel ronojel chupan ri k'ij tok xtunic'oj rij ronojel ri revan-ri' pa cánima^x ri vinak, achel nu'ij ri utzulaj ch'abel ri nintzizoj yin ri nu'ij achique ruchojmil yecolotaj ri vinak.

Ri israelitas y ri ley ri xyo'ox chique

¹⁷Rat nuvinak, can yaquicot na'ij chi rat israelita, y cukul ac'u'x chi xcarucol ri Dios roma chave rat xuya-vi ri ley, y nana' chi c'o avakale'n roma na'ij chi rat rutinamit ri Dios.^y ¹⁸Na'ij chi aveteman achique nrojo' ri Dios, y chi aveteman ri más utz chi ni'an,^z roma c'utun chavech ri nu'ij chupan ri ley. ¹⁹Ayon nanojij-ka chi yatiquer nac'ut bey chiquivech ri man yetzu'un ta, y chi rat sakil chiquivech ri ec'o pa k'eku'n. ²⁰Na'ij chi rat c'utuy bey chiquivech ri man queteman ta achique ri utz y achique ri man utz ta, y chi ye'atijoj ri man eq'uiyinak ta chupan ruch'abel ri Dios, roma chave rat yo'on-vi ru-ley ri Dios ri c'o ronojel ruchojmil ri kitzij chupan. ²¹Rat ri ye'atijoj ch'aka' chic, ¿achique roma man natijoj ta ka avi' rat mismo?^a Rat na'ij chi man utz ta ri elak', pero xa ja rat mismo yabano elak'. ²²Rat nac'ut chi ri vinak man tiquic'amala-ka-qui' riq'uin jun ri mana-ta achok quiq'uin ec'ulan-vi, pero xa ja rat ri quiri' yatajin riq'uin. Rat na'ij chi can itzel quetz'et ri tiox, pero xa ja rat yabano-pe

^t 2:8 2 Ts. 2:12. ^u 2:8 Is. 3:11. ^v 2:11 Job 34:19; Hch. 10:34. ^w 2:13 Stg. 1:22, 25.

^x 2:16 Ap. 20:12. ^y 2:17 Mi. 3:11. ^z 2:18 Dt. 4:8. ^a 2:21 Mt. 23:3.

elak' ri pa tak jay ri niyo'ox-vi quik'ij ri tiox ri'. ²³Rat nanimirisaj-avi' roma c'o ru-ley ri Dios aviq'u'in, pero xa nakasaj ruk'ij ri Dios riq'u'in ri nak'aj ri nu'ij chupan ri ru-ley. ²⁴Romari' ri ruch'abel ri Dios nu'ij: Avoma rat^b niyok' rubi' ri Dios coma ri man israelitas ta. Quiri' ri tz'iban can.

²⁵Kitzij na vi chi ri circuncisión ri banon chave, c'o utz nuq'uen-pe, si na'an^c ri nu'ij chupan ri ley ri xuya' ri Dios; pero si nak'aj ri nu'ij ri ley, junan nu'ij chi achel man banon ta ri circuncisión chave. ²⁶Quiri' mismo jun achi ri man banon ta ri circuncisión che, si nu'on ri nu'ij ri ley, chuveh ri Dios junan nu'ij chi achel can ta banon ri circuncisión che. ²⁷Rija' xtu'ij chi ri Dios can pa ruchojmil nu'on chi nuya' castigo pan avi' rat, ri masque banon ri circuncisión chave, y masque can pan ak'a' c'o-vi ri ley, pero xa nak'aj ri nu'ij chupan. ²⁸Roma mana-ta ri nuc'ut-ri' chi israelita ri kitzij richin rutinamit ri Dios, y nis-ta ri circuncisión^d ri ni'an che ri cuerpo, mana-ta ri' ri kitzij circuncisión. ²⁹Ri kitzij israelita, ja ri ch'ajch'oj ránima, y ri kitzij circuncisión,^e ja ri ni'an pa ránima roma ri Lok'olaj Espíritu, y mana-ta ri ni'an che ri cuerpo ri achel nu'ij chupan ri ley. Ri ch'ajch'oj ránima, man aj-roch'ulef ta xqueyo'on ruk'ij, xa ja ri Dios.

3 ¹Si ja achel ri xka'ij-ka, quiri' rubeyal, ¿achique más kabanon roj israelitas chiquivech ri man israelitas ta? Y, ¿achique utz nuq'uen-pe chi banon ri circuncisión chike? ²Yin nin-ij chi c'o q'uuy utz nuq'uen-pe chike. Ri na'ey, ja chi pa kak'a' roj israelitas yo'on-vi can ri ruch'abel ri Dios. ³Y masque ec'o israelitas man xquinimaj ta^f ri Dios, pero man roma ta ri' man ta xtu'on ri ru'in can.^g ⁴¡Man quiri' ta! Masque roj vinak konojel roj tz'ucuy tzij, pero ri ni'in ri kitzij, xaxe ri Dios. Achel ri tz'iban can chupan ruch'abel ri nu'ij:

Xtik'alajin ta c'a chi can kitzij vi ri ach'abel, rat Ajaf,

Y si ec'o xque'in chi man pa ruchojmil ta xa'an viq'u'in pa ruvi' ri numac, xtik'alajin ta c'a chi man xasatz ta chi xaya' castigo pa nuvi'.^h

Quiri' nu'ij chupan ri tz'iban can.

⁵Pero si ja ri man choj ta ri yekabanala' nibano chi más nik'alajin-pe chi ri Dios can choj vi nu'on ronojel, ¿achique nika'ij tok ri Dios nuya' castigo pa kavi'? Nin-ij na c'a chive achique niqul'ij ri vinak aj-roch'ulef. Rije' quire' niqul'ij: Ri Dios man choj ta nu'on kiq'u'in chi nuya' castigo pa kavi', yecha'. ⁶Pero manak che'el chi ri Dios man ta choj. Roma si man ta choj, ¿achel xtunic'oj cánima ri vinak choch'ulef?ⁱ ⁷Pero riq'u'in juba' c'o jun nu'ij: Si roma ri tz'ucun tzij ri nin-en yin, romari' nik'alajin chi kitzij ronojel ri nu'ij ri Dios, y romari' más niyo'ox ruk'ij; si quiri', man utz ta

^b 2:24 Ez. 36:20. ^c 2:25 Gá. 5:3. ^d 2:28 Ef. 2:3; Gá. 6:15. ^e 2:29 Ro. 7:6; Fil. 3:3; Col. 2:11. ^f 3:3 He. 4:2. ^g 3:3 Nm. 23:19. ^h 3:4 Sal. 51:4. ⁱ 3:6 Gn. 18:25; Sal. 9:8.

nu'on chi rija' nuya' castigo pa nuvi' roma ri mac ri'. ⁸Pero xa ta kitzij achel nu'ij ri jun ri', roj c'o ta che'el nika'ij chi tikabana' mac, richin quiri' nik'alajin-pe ri utz, achel ri k'eban tzij ri ni'an chikij roj chi jari' nikac'ut. Pero ri quiri' ye'in, can utz vi chi nika castigo pa quivi'.^j

Man jun vinak choj ruc'aslen

⁹Y, ¿achique nika'ij vacami? ¿Ri Dios, más cami utz nkurutz'et roj israelitas que chiquivech ri man israelitas ta? Man quiri' ta. Achel ri xka'ij yan ka, chi israelitas y man israelitas ta, konojel roje'o chuxe' ruchuk'a' ri mac.^k ¹⁰Achel nu'ij ruch'abel ri Dios ri tz'iban can:

Man jun vinak choj ruc'aslen. Can man jun.^l

¹¹ Man jun reteman achique ri utz

Y man jun nicanon ri Dios.

¹² Conojel xe'el-e chupan rubey ri Dios, man jun chic ric'a'tz xu'on-ka ri quic'aslen.

Man jun nibano ri utz. Can man jun.

¹³ Achel itzel ruxla'^m quiujl anima'i' jakal, quiri' ri ch'abel ntel pa quichi'. Satzoj no'oj c'o chutza'n cak',

Y ri ch'abel ntel pa quichi', achel ru-ponzoña jun cumatz.

¹⁴ Ruyon yok'onc tak tzij yech'o;" q'uey-q'uey ri ch'abel ntel pa quichi'.

¹⁵ Man tiquic'axaj jun ch'uti tzij, ja nequibana' camic.^o

¹⁶ Xa achique na lugar yek'ax-vi, ronojel niquiq'uis can ruk'ij y xe k'axomal niquiya' can.

¹⁷ Man juba' queteman niquic'uaj-qui' chuvi' uxlanan quiqu'in ch'aka' chic.

¹⁸ Man juba' niquixi'ij-qui' chuvech ri Dios.^p

Quiri' nu'ij ri tz'iban can.

¹⁹Y roj keteman chi ronojel ri tz'iban can chupan ri ley ri xyo'ox che ri Moisés, chique ri ec'o chuxe' ri ley ri' nich'o-vi. Riq'uin ri', y riq'uin ri ka'in chic, nikatz'et chi nis-ta jun vinak c'o che'el nu'ij chi manak rumac, y chi conojel nuc'ul chi c'o castigo nuk'at ri Dios pa quivi' tok xtunic'oj ri cánima. ²⁰Roma masque jun vinak rubanon ri nu'ij chupan ri ley, pero man roma ta ri' man jun rumac nrakalej chuvech ri Dios. Ri ley xaxe nuc'ut chikavech chi can roj aj-mac vi.^q

Ri nuya' ránima riq'uin ri Jesucristo, man jun mac nrakalej chuvech ri Dios

²¹ Jac'a ri vacami, ri Dios ruk'alajrisan chikavech ri achel chi roj man jun chic kamac nikakalej chuvech, masque man kaniman ta ri nu'ij

^j 3:8 Ro. 5:20; 6:1, 15. ^k 3:9 Ro. 3:23. ^l 3:10 Sal. 14:1-3; 53:1-3. ^m 3:13 Sal. 5:9;

Mt. 23:27. ⁿ 3:14 Sal. 10:7. ^o 3:15 Pr. 1:16; Is. 59:7. ^p 3:18 Sal. 36:1. ^q 3:20 Ro. 7:7.

chupan ri ley ri xyo'ox che ri Moisés. Y ri c'ac'ac' ruchojmil re' ruc'uan-ri' riq'uin ri tz'iban can chupan ri ley y riq'uin ri tz'iban can coma ri profetas.^r ²²Ri Dios nuc'ut chikavech chi xa achique na ri nuya' ránima riq'uin ri Jesucristo, man jun rumac nrakalej.^s Roma chuveh ri Dios konojel xa roj junan,^t ²³roma konojel xka'an mac, y naj rojc'o-vi che ri c'aslen c'o ruk'ij ri nusuj ri Dios. ²⁴Xaxe roma ru-favor^u ri Dios tok man jun kamac nikakalej chuveh, y re' xa nusipaj chike, roma ri Jesucristo xojrulok' chic richin xojrelesaj pa ruk'a' ri ximiyon kichin. ²⁵Y ri Dios ja ri Jesucristo xuya' richin xrakalej^v ri kamac konojel ri cukul kac'u'x chi riq'uin ri xbin ri ruquiq'uel ri Jesucristo, nkucolotaj chuveh ri mac. Quiri' xu'on ri Dios richin nuk'alajrisaj chikavech chi choj ri xu'on chi man xuya' yan ta rajil-ruqu'uxel quimac ri vinak ojer can, tok jani na xerucoch'. ²⁶Roma nrojo' nuk'alajrisaj chi ja jun ri tiempo re' choj nu'on, y chi rija' can choj riq'uin ri najin tok nu'on chi man jun mac nrakalej xa achique na ri nuya' ránima riq'uin ri Jesucristo.

²⁷Y roma ri quiri', ¿utz camí chi roj israelitas nikaya-ka kak'ij?^w Man utz ta. Roj xaxe riq'uin nikaya' kánima riq'uin ri Jesucristo ni'an chike chi man jun kamac nikakalej chuveh ri Dios, y man nikach'ec ta riq'uin ri yekabanala'. ²⁸Chiri' c'a nik'alajin-vi chi ri nuya' ránima riq'uin ri Jesús, jari' ri man jun rumac^x nrakalej chuveh ri Dios, rubanon o man rubanon ta ri nu'ij ri ley ri xuya' ri Dios. ²⁹Y manak che'el nika'ij chi ri Dios xaxe kichin roj israelitas. Rija' qui-Dios mismo ri man israelitas ta. ³⁰Ri Dios xa jun, y ja rija' nibano chique conojel chi manak quimac nicakalej chuveh tok niquiya' cánima riq'uin ri Jesucristo, chi israelitas y man israelitas ta.^y ³¹Pero si roj kayo'on kánima riq'uin ri Jesús, man nu'ij ta tzij chi man jun rakale'n nika'an che ri ley ri xyo'ox che ri Moisés. Man quiri' ta. Roma roj ri kayo'on kánima riq'uin ri Jesús can nika'an che ri ley chi c'o rakale'n.^z

Ri niketemaj chirij ruc'aslen ri Abraham

4 ¹Vacami c'a, ¿achique nkutiquer nika'ij pa ruvi' ruc'aslen ri Abraham ri kamama' roj israelitas? ²Rija' man roma ta ri utz xerubanala' tok man jun rumac xrakalej chuveh ri Dios; xa ta roma ri utz xerubanala', can ta c'o che'el ruyon xuya-ka ruk'ij, pero chuveh ri Dios manak che'el chi quiri'.^a ³Tuka chi'ic'u'x ri tz'iban can chupan ruch'abel ri Dios, ri nu'ij: Ri Abraham cukul ruc'u'x chi can nibanataj-vi ri xusuj ri Dios che, romari' ri Dios xu'on che chi manak rumac xrakalej.^b Quiri' nu'ij ri tz'iban can. ⁴Y xa achique na jun ri xa riq'uin

^r 3:21 Ro. 1:2. ^s 3:22 Ro. 10:4. ^t 3:22 Col. 3:11; Gá. 3:28. ^u 3:24 Ef. 2:8.

^v 3:25 1 Jn. 2:2; 4:10. ^w 3:27 1 Co. 1:29. ^x 3:28 Gá. 2:16. ^y 3:30 Ro. 10:12.

^z 3:31 Mt. 5:17. ^a 4:2 1 Co. 1:31. ^b 4:3 Gn. 15:6; Ro. 4:22; Gá. 3:6; Stg. 2:23.

ri yerubanala' cukul-vi ruc'u'x chi manak rumac xtrakalej chuvech ri Dios, ri rajil-ruqu'uxel ri xtuc'ul, man sipanic ta chic, xa can c'as richin niyo'ox che. ⁵Jac'a ri man riq'u'in ta ri yerubanala' cukul-vi ruc'u'x, can ni'an-vi che chi man jun rumac nrakalej,^c si nicuke-apu ruc'u'x riq'u'in ri Jun ri nitiquer nu'on che ri vinak manak Dios pa ruvech chi man jun rumac nrakalej. ⁶Ja jun ri rey David xch'o pa ruvi' ri utzulaj tzij ri ni'an che ri vinak ri manak rumac nrakalej chuvech ri Dios, c'o man c'o utz rubanalalo'n. ⁷Y quire' c'a ri ru'in can:

Utzulaj tzij banon chique ri banon chic perdonar ri man utz ta ri quibanalalo'n,^d

Y tz'apin chic rij ri quimac.

⁸Utzulaj tzij banon che ri achi ri manak mac rakalen chuvech ri Dios.^e

Quiri' ru'in can ri David.

⁹¿La xe camí chike roj israelitas ri banon ri circuncisión chike nu'ij-vi chi utzulaj tzij ni'an chike? Man quiri' ta; ja jun chique ri man israelitas ta ri man banon ta ri circuncisión chique. Roma ruch'abel ri Dios ri xkac'uxlaj yan ka nu'ij chi ri Abraham cukul ruc'u'x chi ri xusuj ri Dios che can nibanataj-vi, romari' ri Dios xu'on che chi man jun rumac xrakalej. ¹⁰Ri Abraham c'a man jani ti'an ri circuncisión che chiri', tok x-an yan che chi man jun rumac rakalen chuvech ri Dios. ¹¹Ri circuncisión^f ri x-an che, jun retal chi ri Dios rubanon chic che chi man jun rumac rakalen roma cukul chic ruc'u'x chi ri xusuj ri Dios che, can nibanataj-vi. Riq'u'in ri', rija' jun tata'aj quichin conojel ri cukul quic'u'x riq'u'in ri Ajaf,^g masque man banon ta ri circuncisión chique, richin quiri' ja jun rije' ni'an chique chi man jun quimac nicakalej, roma cukul quic'u'x chi can niyo'ox-vi chique ri rusujun ri Dios. ¹²Y ja jun pa kavi' roj israelitas ri banon ri circuncisión chike, ri Abraham tata'aj, pero man xe ta roma banon ri circuncisión chike, (chuka', ka) roma cukul kac'u'x chi nibanataj ri rusujun ri Dios chike, achel xu'on ri Abraham na'ey chi x-an circuncidar.

Roma cukul kac'u'x, ri Dios nuya' chike ri rusujun

¹³Y man roma ta chi ri Abraham xu'on ri nu'ij ri ley tok ri Dios xu'ij che chi xtuya' ri roch'u'lef pa ruk'a', o pa quik'a' ri eriy-rumam.^h Man quiri' ta. Ri Dios quiri' xu'ij roma rubanon chic che ri Abraham chi man jun rumac rakalen, roma ri Abraham cukul ruc'u'x chi ri xusuj ri Dios che, can nibanataj-vi. ¹⁴Roma si ja ri yebano ri nu'ij ri ley ri xyo'ox che ri Moisés, jari' ri yec'ulu ri rusujun can ri Dios,ⁱ man jun nic'atzin-vi chi

^c 4:5 Gá. 2:16. ^d 4:7 Sal. 32:1. ^e 4:8 Sal. 32:2. ^f 4:11 Gn. 17:10. ^g 4:11 Gá. 3:7, 29.

^h 4:13 Gn. 12:3; 17:4; 22:17; 28:14; Gá. 3:29. ⁱ 4:14 Gá. 3:18.

roj cukul kac'u'x riq'uin ri Dios, y xa man niyo'ox ta chike ri rusujun can. ¹⁵Pero man quiri' ta. Roma ri ley xaxe nuc'ut chikavech chi can nika na vi royoval ri Dios pa quivi' conojel' ri yek'ajo ri nu'ij. Pero man ta na ri ley, manak che'el ni'ix chi nik'aj ri nu'ij.

¹⁶Roma c'a ri', ja chique ri cukul quic'u'x chi can nibanataj-vi ri sujun, chique rije' nuya-vi ri Dios ri rusujun, richin chi nik'alajin chi can kitzij chi sipanic, roma ri Dios nrojo' chi conojel ri eriy-rumam ri Abraham c'o quik'a' che ri sujun; man xe ta ri israelitas ri c'o ri ley richin ri Moisés pa quik'a', ja jun ri man israelitas ta^k ri cukul quic'u'x chi can nibanataj-vi ri rusujun ri Dios, achel xu'on ri Abraham ri ocunak tata'aj pa kavi' chi nimalaj konojel. ¹⁷Achel nu'ij chupan ri tz'iban can tok ri Dios xu'ij che ri Abraham: Nubanon chave chi xcate'oc tata'aj pa quivi' q'uiy tinamit, xcha'. Y ri Abraham xunimaj ri xbix che roma ri Dios ri nic'ason quichin ri anima'i' y nu'on chi yec'uje' ri man jani quec'uje'. ¹⁸Ri Abraham cukul ruc'u'x chi can nibanataj-vi ri xbix che roma ri Dios, masque c'ayef chi nibanataj roma rija' xa ri'lj chic. Y riq'uin ri quiri' xu'on che ri ránima, xoc tata'aj pa quivi' q'uiy tinamit, achel ri xbix che roma ri Dios chi eq'uiy riy-rumam xquec'uje'.^m ¹⁹Man juba' xuya' can chi cukul ruc'u'x chi nibanataj ri sujun che, masque nunojij chi ri ru-cuerpo xa c'o chic chupan rubey ri camic roma xa juba' chic nrojo' chi cien rujuna', y chi ri Saraⁿ ri rixayil can man alanel ta vi. ²⁰Man caca' ta ruc'u'x xu'on y man xyamayo' ta ka chi nunimaj chi nibanataj ri xbix che roma ri Dios, xa más xcuker ruc'u'x riq'uin ri Dios y xuya' ruk'ij. ²¹Xa jun rubanon che ri ránima chi ri Dios c'o ruchuk'a' richin nitiquer nu'on ri nusuj.^o ²²Romari ri Abraham x-an che roma ri Dios chi man jun rumac xrakalej. ²³Y man xe ta pa ruvi' ri Abraham nich'o-vi ruch'abel ri Dios ri tz'iban can^p ri nu'ij chi ri Abraham man jun rumac xrakalej chuveh ri Dios, ²⁴xa ja jun pa kavi' roj ri nuc'un chic pe chi man jun kamac xtekakalej chuveh ri Dios riq'uin ri necuke' kac'u'x riq'uin ri xc'ason-pe richin ri Kajaf Jesús chiquicojol ri anima'i'.^q ²⁵Ri Jesucristo xjach pa camic koma,^r roma xkak'aj ri nu'ij ri ley, y xc'asos-e chiquicojol ri anima'i' richin chi man jun kamac nikakalej chuveh ri Dios.^s

C'o rakale'n chi man jun kamac kakalen chuveh ri Dios

5 ¹Vacami c'a, roj ri man jun kamac kakalen chuveh ri Dios roma cukul kac'u'x riq'uin ri rusujun chike, junan chic kánima riq'uin ri Dios roma ri Kajaf Jesucristo,^t ²ri nkucusan-apu chupan ru-favor ri Dios ri achok chupan cof roj pa'el-vi.^u Quiri' nu'on chike roma cukul

^j 4:15 Gá. 3:10. ^k 4:16 Col. 3:11. ^l 4:17 Jn. 5:21. ^m 4:18 Gn. 15:5.

ⁿ 4:19 Gn. 18:11. ^o 4:21 Gn. 18:14. ^p 4:23 1 Co. 10:11. ^q 4:24 1 P. 1:21.

^r 4:25 Ro. 5:6; 8:32. ^s 4:25 1 P. 3:18. ^t 5:1 Is. 32:17. ^u 5:2 1 Co. 15:1; He. 3:6.

kac'u'x riq'uin. Y can c'o rakale'n chikavech chi koyo'en ri k'ij tok junan xkuc'uje' riq'uin ri Dios ri c'o nimalaj ruk'ij. ³Y man xe ta ri', ja jun tok nikak'asaj k'axomal' pa kac'aslen, can c'o rakale'n chikavech, roma keteman chi ri k'axomal nu'on chike chi más nkucoch'on. ⁴Y ri coch'on k'axomal, más nutz'akatisaj ri kac'aslen chirakan ri Dios.^w Y tok más tz'akat chic ri kac'aslen, más nikoyo'ej-apu ri favor ri sujun chike. ⁵Y man nkuyo'ox ta can chi q'uix riq'uin ri koyo'en roma ri Dios can nkurojo'. Y jabel keteman chi nkurojo' roma ri Lok'olaj Espiritu ri ruyo'on pa tak kánima.^x

⁶Roma tok c'a man jun nito'on kichin chuvehch ri kamac chiri', jari xril ruk'ijul' ri runojin-pe ri Dios chi (xcom, xquen) ri Jesucristo pa quiq'uexel^z conojel ri manak Dios pa quivech. ⁷Kitzij na vi chi c'ayef nilitaj jun vinak ri nrojo' nuya-ri' pa camic pa ruq'uexel jun ri choj ruc'aslen, o riq'uin juba' c'o jun man nupokonaj ta ri' nicamises pa ruq'uexel jun ri utz ruc'aslen. ⁸Pero ri Dios nuc'ut chikavech chi kitzij nkurojo',^a roma ri Jesucristo xuya-ri' pa camic pa kaq'uexel^b tok c'a quiri' na roj'o chupan ri kamac. ⁹Vacami riq'uin chi xbin ruquiq'uel^c ri Jesucristo koma, man jun kamac kakalen chuvehch ri Dios, y romari' más na k'alaj chi can nkucolotaj-vi chuvehch ri royoval.^d ¹⁰Roma tok roj c'a itzel na nikatz'et ri Dios chiri', rija' riq'uin ri rucamic ri Ruc'ajol xuc'ut chi xuc'ul kavech. Y vacami riq'uin ri ruc'ulun chic kavech,^e más na k'alaj chi xkucolotaj chuvehch ri royoval riq'uin ruc'aslen ri Ruc'ajol.^f ¹¹Y man xe ta ri', ri Dios nu'on chike chi nkuquicot roma ri Kajaf Jesucristo, ri achok roma vacami c'ulun chic kavech roma ri Dios.^g

Ri nuq'uen-pe ri xu'on ri Adán y ri nuq'uen-pe ri xu'on ri Jesucristo

¹²Ri nuq'uen-pe ri nu'in chic ka chive jare': Ri mac xoc choch'ulef roma jun achi, y ri mac xa xuq'uen-pe camic.^h Chiri' xtiquer-vi-pe chi konojel roj vinak (nkucom, nkuquen), roma konojel nika'an mac.ⁱ ¹³Quiri' nin-ij chive roma chupan ri tiempo tok ri Dios man jani tuya-pe ri ley che ri Moisés, ri vinak can c'o-vi mac niqui'en, pero manak che'el xbix chi can mac ri xbanataj,^j roma ri Dios man jani tuya-pe ri ley. ¹⁴Pero masque quiri', conojel vinak ri xec'uje' pa ru-tiempo ri Adán hasta ri tiempo tok xyo'ox ri ley pa ruk'a' ri Moisés, xa (xecom, xequen), masque ri k'ajon tzij ri xqui'en man junan ta riq'uin ri xu'on ri Adán, ri achok pa ruc'aslen c'o niketemaj chirij ruc'aslen ri Jesucristo ri nuc'un chic pe chi nipe chirij can ri Adán.

^v 5:3 Mt. 5:11, 12. ^w 5:4 Stg. 1:3, 12. ^x 5:5 2 Co. 1:22; Gá. 4:6. ^y 5:6 Gá. 4:4.

^z 5:6 He. 9:26; Ef. 5:2. ^a 5:8 Jn. 15:13. ^b 5:8 1 P. 3:18; Ef. 5:2. ^c 5:9 1 Jn. 1:7.

^d 5:9 1 Ts. 1:10. ^e 5:10 2 Co. 5:18. ^f 5:10 Jn. 14:19. ^g 5:11 Col. 1:20.

^h 5:12 Gn. 3:1-24; 1 Co. 15:21. ⁱ 5:12 Ro. 6:23. ^j 5:13 1 Jn. 3:4.

¹⁵Pero jun vi nuq'uen-pe ri sipanic ri xuya' ri Dios y jun vi nuq'uen-pe ri k'ajon tzij ri xu'on ri Adán. Roma ri k'ajon tzij, xu'on chique eq'uiy chi xe'oc chuxe' ruchuk'a' ri camic. Pero can más vi kitzij chi roma ri favor xurubana-ka ri jun achi rubinan Jesucristo,^k tok eq'uiy niqul ri favor y ri sipanic ri nuya' ri Dios. ¹⁶Ri nuq'uen-pe ri sipanic ri nuya' ri Dios, man juba' junan riq'uin ri nuq'uen-pe ri rumac ri Adán. Roma xaxe riq'uin ri jun mac ri xu'on ri Adán tok ri Dios xu'ij chi can nuc'ul-vi chi nika castigo pa kavi' konojel. Pero roma ri ajani na chi k'ajon tak tzij xka'an roj vinak, ri Dios xusuj ri sipanic ri nibano chi man jun chic mac nikakalej chuveh. ¹⁷Roma si riq'uin ri k'ajon tzij ri xu'on xaxe jun achi, xojoc chuxe' ruchuk'a' ri camic, can más na vi kitzij chi riq'uin ri xu'on ri Jesucristo, conojel ri xquec'ulu ri nimalaj favor y ri sipanic ri nu'on chi man jun chic quimac nicakalej chuveh ri Dios, xtiq'ui'en gobernar chupan ri c'aslen ri richin jumul.

¹⁸Roma c'a ri', achel xka castigo pa quivi' conojel vinak roma ri k'ajon tzij ri xu'on ri Adán, quiri' mismo roma ri chojmilaj samaj xu'on ri Jesucristo,^l conojel ri niq'uiya' cánima riq'uin, man jun quimac nicakalej chuveh ri Dios y niqul ri c'aslen ri richin jumul. ¹⁹Roma riq'uin ri man xniman ta ri Adán riq'uin ri xbix che roma ri Dios, conojel vinak xe'oc aj-mac, quiri' mismo riq'uin xniman ri Jesucristo riq'uin ri xbix che roma ri Dios, conojel ri niq'uiya' cánima riq'uin, ni'an chique chi man jun quimac nicakalej. ²⁰Ri ley ri xuya' ri Dios, xyo'ox richin xk'alajin-pe chi ri kamac roj vinak can q'uiy vi. Pero tok xq'uiyer ri mac, más xq'uiyer ri utzulaj ru-favor^m ri Dios pa kavi', ²¹richin quiri' achel ri mac xerumaj conojel vinak richin xe'oc chuxe' ruchuk'a' ri camic, can ta quiri' mismo ri ru-favor ri Dios yeril conojel richin ni'an chique chi man jun quimac nicakalej, richin niqul ri c'aslen ri richin jumul ri niyo'ox chique roma ri xu'on ri Kajaf Jesucristo.

Roj roj caminak chic chuveh ri mac

6 ¹¿Achique nika'ij vacami? ¿Utz cami chi c'a nika'an na mac richin niq'uiyer-pe más ru-favor ri Dios?ⁿ ²Man utz ta. Roma roj ri roj caminak^o chic chuveh ri mac ri nalex-pe pa kánima, ¿achel chi c'a nikasuk' na ki' chupan ri mac? ³Rix iveteman chi roj ri xoj-an bautizar, xkaya-ki' pa ruk'a' ri Cristo Jesús,^p y ri bautismo jari' retal chi junan (xojcom, xojquen) riq'uin. ⁴Roma tok xoj-an bautizar, achel can ta junan xojmuk riq'uin, richin chi (nkucom, nkuquen) chuveh ri mac ri nalex-pe pa kánima, richin quiri' achel xc'astaj-pe ri Jesucristo

^k 5:15 Mt. 20:28; He. 9:28. ^l 5:18 Ro. 3:25. ^m 5:20 1 Ti. 1:14. ⁿ 6:1 Ro. 5:21.

^o 6:2 Gá. 6:14; Col. 3:3. ^p 6:3 Gá. 3:27.

chiquicojol ri anima'i' roma ruchuk'a' ri Katata' Dios, quiri' mismo roj xojc'astaj riq'uin,^q richin nikac'uaj c'ac'ac' c'aslen.

⁵Roma si roj xa jun chic kabanon riq'uin' ri Jesucristo roma xkaya' can ri c'aslen ri xkac'uaj ri jun bey can, achel xuya' can rija' ri c'aslen choch'udef richin xbe chicaj; quiri' mismo can xkuc'astaj-e chiquicojol ri anima'i' achel xu'on rija'. ⁶Tuka chikac'u'x chi ri itzel c'aslen ri xkac'uaj na'ey, achel junan xcamises riq'uin ri Jesucristo tok xbajix chuvech cruz,^s richin chi ri ka-cuerpo ri can nurayij nu'on mac, manak chic che'el nu'on caso che ri itzel c'aslen ri', richin quiri' man roj rusamajela' ta chic ri mac ri nalex-pe pa kánima. ⁷Roma jun vinak tok caminak chic, man nu'on ta chic mac; xa xcolotaj yan e chuvech.^t ⁸Y roma roj achel junan (xojcom, xojquen) riq'uin ri Jesucristo, romari' cukul kac'u'x chi xtic'uje' kac'aslen riq'uin rija'.^u ⁹Roma keteman chi riq'uin xc'asos-e ri Jesucristo chiquicojol ri anima'i',^v man (nicom, niquen) ta chic, roma manak chic ruk'a' ri camic che.^w ¹⁰Roma riq'uin ri camic ri xuk'asaj,^x xuq'uis ruchuk'a' ri mac jumul. Jac'a riq'uin ri ruc'aslen ri c'o vacami, can nuyavi ruk'ij ri Dios. ¹¹Quiri' mismo rix, tiya' pan ivánima chi can kitzij rix caminak chic chuvech ri mac ri nalex-pe pan ivánima, y can achel junan xixc'astaj-pe riq'uin ri Jesucristo richin niya' ruk'ij ri Dios,^y roma xa jun chic ibanon riq'uin ri Kajaf Cristo Jesús.^z

¹²Romari' nin-ij chive: Man c'a tiya' lugar che ri mac chi nitakchi'in pa ruvi' ri i-cuerpo^a ri xa niq'uis; man xa tu'on chive chi ni'en caso che ri man utz ta ri nurayij; ¹³nis-ta man que'iya' ri ik'a-ivakan richin samajbel pa ruk'a' ri mac. Xa tijacha-ivi' pa ruk'a' ri Dios achel can ta xixc'astaj yan pe chiquicojol ri anima'i', y ri ik'a-ivakan que'iya' pa ruk'a' ri Dios chusamajisic ri choj. ¹⁴Roma ri mac ri nalex-pe pan ivánima, man jun chic ruk'a' chive, roma vacami mana-ta chic chuxe' rutzij ri ley^b ri xyo'ox che ri Moisés rixc'o-vi, xa chuxe' chic ri ru-favor ri Dios.

Vacami roje'o chic chuxe' rutzij ri chojmilaj c'aslen

¹⁵Riq'uin ri xka'ij yan ka, riq'uin juba' ec'o niquinojij chi vacami ri Dios xa nuya' lugar chike chi nika'an mac, roma man chuxe' ta chic rutzij ri ley ri xyo'ox che ri Moisés roje'o-vi, xa chupan ru-favor^c ri Dios. Man tikanojij quiri'. ¹⁶Man timestaj, si rix nic'ayij-ivi' pa ruk'a' jun richin yixc'uje' chuxe' rutzij, can ja ri ninimaj-apu rutzij ri ocunak ivajaf. Si yixc'uje' chuxe' rutzij ri mac,^d yixruc'uaj pa camic, jac'a si yixc'uje' pa ruk'a' ri Dios richin ninimaj rutzij, yixruc'uaj chupan ri c'aslen choj. ¹⁷Pero matiox che ri Dios, masque rix ic'ayin-ivi' chuxe' rutzij ri

^q 6:4 Col. 2:12. ^r 6:5 Fil. 3:10. ^s 6:6 Gá. 2:20. ^t 6:7 1 P. 4:1. ^u 6:8 Jn. 14:19;

2 Ti. 2:11. ^v 6:9 Ro. 6:4. ^w 6:9 Ap. 1:18. ^x 6:10 He. 10:10. ^y 6:11 Gá. 2:19.

^z 6:11 Col. 3:3. ^a 6:12 Ef. 4:22. ^b 6:14 Gá. 5:18. ^c 6:15 Gá. 2:17-19. ^d 6:16 Jn. 8:34.

mac rubanon can, vacami riq'uin ronojel ivánima ninimaj ri ch'abel ri xixtijox riq'uin, ri achok chupan xixkaya-vi can richin ninimaj ri nu'ij; ¹⁸ y xixsok'opitaj-pe chuxe' rutzij ri mac^e richin xixoc chuxe' rutzij ri chojmilaj c'aslen.^f ¹⁹Yin xa aj-roch'udef ejemplo nincusaj richin nin-ij re' chive, roma man ta nincusaj ejemplo, c'ayef chi rix niq'uén can ruchojmil ri ninjo' nin-ij chive. Roma can achel xijach ik'a-ivakan pa ruk'a' ri netzelan ri ic'aslen richin xi'en ri man utz ta ri xe'irayij, vacami ri ik'a-ivakan tijacha' richin ni'en ri choj, richin chi nich'ajch'ojir más ri ic'aslen.

²⁰Roma tok xixc'uje' pa ruk'a' ri mac, ri chojmilaj c'aslen chuvech ri Dios man jun ruk'a' chive. ²¹¿Y achique ta xich'ec chupan ri itzel c'aslen ri xic'uaj ri jun bey can ri xa yixquix tok nic'uxlaj-pe ri vacami? Man jun. Roma pa ruq'uisbel, xa camic nuq'uén-pe chive. ²²Jac'a ri vacami xixsok'opitaj yan pe chupan ri mac ri nalex-pe pan ivánima, y banon chic chive chi rixc'o pa ruk'a' ri Dios, y riq'uin ri', nich'ec ri ch'ajch'oj c'aslen chuvech ri Dios, y pa ruq'uisbel, ri c'aslen ri richin jumul.^g ²³Roma ri rajil ri nuya' ri mac xa ja ri camic. Jac'a ri Dios nusipaj ri c'aslen ri richin jumul chique ri xa jun quibanon riq'uin ri Kajaf Jesucristo.

Ri ejemplo chirij ri c'ulubic

7 ¹Rix ri junan kaniman ri Jesucristo iviq'uin, iveteman ri achique nu'ij ri ley; iveteman chi jun vinak xaxe tok c'a q'ues na c'o chuxe' rutzij ri ley. ²Ninya' na jun ejemplo chivech: Pa ruvi' ri ec'ulan, ri ley nu'ij chi ri ixok c'o chuxe' rutzij ri rachijil tok ri achi c'a q'ues na.^h Pero si ri rachijil (nicom, niquen) e, ri ixok man ximil ta chic chuxe' rutzij ru-ley ri c'ulubic. ³Romari' ri ixok ri q'ues ri rachijil, si nic'uje' chic riq'uin jun achi, xa ni'ix chirij chi jun ixok aj-mac roma man xe ta riq'uin ri rachijil nic'uje-vi.ⁱ Pero si caminak chic ri rachijil, man ximil ta chic chuxe' rutzij ru-ley ri c'ulubic, romari' si nic'ule' chic riq'uin jun achi, chuvech ri ley, mana-ta jun ixok aj-mac.

⁴Y achel jun vinak tok caminak chic, ri ley manak chic ruk'a' che, quiril' mismo rix ri junan kaniman ri Jesucristo iviq'uin, ri ley^j ri xyo'ox che ri Moisés manak chic ruk'a' chive, roma achel can ta junan (xixcom, xixquen) riq'uin ri Jesucristo tok xrip ri ru-cuerpo chuvech cruz richin xcamises. Y vacami xixoc richin rija', ri xc'asos-pe chiquicojol ri anima^l richin c'o utz nik'alajin pan ic'aslen^k achel jun che' ri jabel ruvech nuya'. ⁵Tok xojc'uje' chuxe' rutzij ri nurayij ri ka-cuerpo, ri ley ri xyo'ox che ri Moisés más xuc'asoj ri kak'a-kakan richin xka'an ri itzel tak mac ri nijik'ik' kánima chiquij, ri xa camic nuq'uén-pe pa ruq'uisbel.^l ⁶Jac'a ri vacami xojcolotaj yan chuvech ri nu'ij ri ley y can achel (xojcom, xojquen)

^e 6:18 Gá. 5:1. ^f 6:18 1 Co. 7:22; 1 P. 2:16. ^g 6:22 1 P. 1:9. ^h 7:2 1 Co. 7:39.

ⁱ 7:3 Mr. 10:12; He. 13:4. ^j 7:4 Gá. 2:19; 5:18. ^k 7:4 Ef. 2:10. ^l 7:5 Stg. 1:15.

yan chuvech ri ximiyon kichin rubanon can. Roma c'a ri', vacami kac'ayin-ki' richin nika'an ri nrojo' ri Dios, pero man chuxe' ta chic rutzij ri ley ri xyo'ox che ri Moisés; xa chuxe' yan chic rutzij ri c'ac'ac' c'aslen ri nuya' ri Lok'olaj Espiritu.

RI mac ri nalex-pe pa kánima, c'ayef rubanon chike

⁷Riq'uin juba' nika'ij chi ri ley ri xyo'ox che ri Moisés can itzel, roma nu'on chike chi más nikarayij ri mac. Pero man quiri' ta. Roma xa ja ri ley ri nik'alajrisan chikavech achique ri mac,^m achel tok nu'ij: Man tarayij ri achique c'o riq'uin jun chic.ⁿ Si man ta quiri' nu'ij ri ley, yin man ta xinvetemaj chi can mac vi ri narayij ri c'o riq'uin jun chic. ⁸Jac'a tok xinvetemaj chi man utz ta ri narayij ri c'o riq'uin jun chic, ri mac ri revan-ri' pa vánima más xuc'asoj ri vánima richin xenrayij ronojel ri manak nuk'a' che. Roma tok man jani tiyo'ox ri ley,^o ri mac ri c'o pa vánima, man jun nic'ason-pe richin, xa achel caminak rubanon-ka. ⁹Pa na'ey tok man jani (k'axnak, novinak) ruchojmil ri ley chinuvech, yin xinnojij chi yin jun utzulaj vinak. Jac'a ri k'ij tok xinvetemaj chi xa mac ri narayij ri c'o riq'uin jun vinak, xc'astaj-pe ri mac ri revan-ri' pa vánima, y tok nubanon chic ri nrojo' ri mac, c'ajari' xinna'ej chi yin caminak chuvech ri Dios. ¹⁰Chiri' xinya-vi pa cuenta chi ri mandamiento ri xyo'ox richin nuq'uen-pe c'aslen chuve,^p xa camic na c'a xuq'uen-pe chuve.^q ¹¹Roma ri mac ri revan-ri' pa vánima, ja mismo ri mandamiento ri nu'ij chi man utz ta narayij ri c'o riq'uin jun chic vinak, jari' xucusaj richin xika pa ruk'a'. Ja mismo ri ley xucusaj chuvij richin xuc'ut chinuvech chi yin caminak. ¹²Xa romari' nin-ij chive chi ru-ley ri Dios can lok'olaj vi; quiri' mismo ri mandamiento can lok'olaj vi, utz y choj ri nu'ij.^r

¹³Manak che'el nika'ij chi ja ri utzulaj ley xc'amo-pe camic chuve, xa ja ri mac ri xalex-pe pa vánima ri xc'amo-pe, y ja ri utzulaj ley xucusaj. Chiri' xk'alajin-vi chi ri mac can itzel vi, roma hasta ri utz xucusaj richin xu'on chi nik'ax ruvi' ri itzel ri nu'on. ¹⁴Keteman chi ri ley riq'uin ri Dios petenak-vi, jac'a yin xa yin aj-roch'ulef, yin c'ayin pa ruk'a' ri mac.^s ¹⁵Roma ri yitajin riq'uin, yin mismo man (nik'ax, nino') ta chinuvech; roma ri utz ri ninrayij, xa man nin-en ta. Jac'a ri xa netzelan y man ninrayij ta, xa jari' ri nin-en.^t ¹⁶Y si ja ri man ninjo' ta, xa jari' nin-en, chiri' nik'alajin-vi chi ri ley can utz vi. ¹⁷Y romari' yitiquer nin-ij chi mana-ta yin yibano ri man utz ta, xa ja ri mac ri nalex-pe pa vánima, jari' yinimo chupan ri man utz ta. ¹⁸Chupan ri aj-roch'ulef nuc'aslen, man jun utz.^u Quiri' nuna' ri vánima, roma yin masque ninrayij nin-en ri utz,

^m 7:7 Ro. 3:20. ⁿ 7:7 Ex. 20:17; Dt. 5:21. ^o 7:8 1 Co. 15:56. ^p 7:10 Lv. 18:5.

^q 7:10 Ez. 20:13. ^r 7:12 Sal. 19:8; 1 Ti. 1:8. ^s 7:14 1 R. 21:20, 25. ^t 7:15 Gá. 5:17.

^u 7:18 Gn. 8:21.

pero man yitiquer ta. ¹⁹Roma man nin-en ta ri utz ri ninjo'; xa ja ri man utz ta ri man ninjo' ta ri nin-en. ²⁰Romari' si ja ri man ninjo' ta ri yitajin riq'uin, chiri' nik'alajin-vi chi mana-ta yin yibano; xa ja ri mac ri nalex-pe pa vánima ri yitakchi'in.

²¹Y yin nintz'et chi can quirir' vi nibanataj viq'uin. Tok ninjo' nin-en ri utz, cha'anin nicataj-pe ri mac ri c'o chiri' pa vánima. ²²Niquicot ri vánima riq'uin ri ru-ley ri Dios, ²³pero veteman chi c'o chic jun nitakchi'in ri nuk'a-vakan ri nicataj-pe chirij ri nurayij ri vánima,^y yiruc'uaj chuxe' rutzij ri mac ri can achel rajaf ri nuk'a-vakan. ²⁴¡Juye' oc nuvech yin! ¿Manak camí jun yicolo pa ruk'a' ri nurayij ri nu-cuerpo ri xa camic nuq'uen-pe chuve?'' ²⁵¡Matiox ninya' che ri Dios roma c'o ri Kajaf Jesucristo! Ri achel nubanon vacami, c'ayef roma kitzij chi nuc'ayin-vi' chi nin-en ri nrojo' ri Dios pa vánima, pero ri nuk'a-vakan can achel ec'ayin chuxe' rutzij ri mac.

Ri c'aslen ri uc'uan roma ri Lok'olaj Espíritu

8 ¹Vacami c'a, man jun castigo^x xtika pa kavi' roj ri xa jun chic kabanon riq'uin ri Cristo Jesús, ri man roj uc'uan ta chic roma ri man utz ta ri nurayij ri ka-cuerpo, xa roj uc'uan roma ri Lok'olaj Espíritu.^y ²Roma ri c'ac'ac' c'aslen ri ruyo'on ri Lok'olaj Espíritu chike roj ri xa jun chic kabanon riq'uin ri Cristo Jesús, roj rucolon pa ruk'a' rutzij ri mac ri xa camic nuq'uen-pe chike.^z ³Ri ley ri xyo'ox che ri Moisés man xtiquer ta xojrucol,^a roma manak ruchuk'a' chirij ri man utz ta ri nurayij ri ka-cuerpo. Pero ri man xtiquer ta xu'on ri ley, ja ri Dios xbano: xutak-pe ri Ruc'ajol vave' choch'udef riq'uin jun cuerpo ri achel ka-cuerpo roj aj-mac, richin xcamises roma ri mac, y quirir', ja ri ru-cuerpo ri Ruc'ajol ri xtijo ri castigo ri utz ta chi xka ta pa kavi' roj ri kabanon mac riq'uin ri ka-cuerpo, ⁴richin chi ri chojmilaj c'aslen ri nuc'utuj ri ley ri xyo'ox che ri Moisés, nitzakon pa kac'aslen roj ri man roj uc'uan ta chic roma ri nurayij ri ka-cuerpo, roma vacami xa ja yan chic ri Lok'olaj Espíritu ri uc'uayon kichin. ⁵Roma ri e'uc'uan roma ri nurayij ri qui-cuerpo, can riq'uin ri' benak-vi ri cánima. Jac'a ri e'uc'uan roma ri Lok'olaj Espíritu,^b can riq'uin ri nrojo' ri Lok'olaj Espíritu benak-vi ri cánima. ⁶Roma ri benak cánima chunojixic ri nurayij ri qui-cuerpo, xa camic nuq'uen-pe chique.^c Jac'a ri benak cánima chunojixic ri nrojo' ri Lok'olaj Espíritu, uxlanen pa cánima y c'aslen nuq'uen-pe chique.^d ⁷Ri benak cánima chunojixic ri nurayij ri qui-cuerpo, itzel niqutz'et ri Dios.^e Roma man niquinimaj ta ri nul'ij ri ru-ley, y nis-ta yetiquer niquinimaj, ⁸y ri e'uc'uan

^v 7:23 Gá. 5:17; Stg. 4:1. ^w 7:24 Ro. 6:6; 8:2. ^x 8:1 Ro. 8:34. ^y 8:1 Gá. 5:16.

^z 8:2 Jn. 8:32; Gá. 5:1. ^a 8:3 He. 7:18; Hch. 13:39. ^b 8:5 Gá. 5:22, 23. ^c 8:6 Ro. 6:21.

^d 8:6 Ro. 8:13. ^e 8:7 Stg. 4:4.

roma ri nurayij ri qui-cuerpo, man yetiquer ta niq'ien ri nika chuveh ri Dios.

⁹Jac'a rix, si c'o ri Lok'olaj Espíritu richin ri Dios pa tak ivánima,^f mana-ta chic ri nurayij ri i-cuerpo ri uc'uayon ivichin, xa ja ri Lok'olaj Espíritu. Y ri manak ri Lok'olaj Espíritu quiq'uin,^g man erichin ta ri Jesucristo. ¹⁰Pero si ri Jesucristo c'o pa tak ivánima,^h masque can kitzij na vi chi roma ri mac ri i-cuerpo (nicom, niq'uen) e chuveh ri roch'ulef, pero ri ivánima c'o ruc'aslen richin jumul, roma manak chic mac ivakalen chuveh ri Dios. ¹¹Y si pan ivánima c'o ri ru-Espíritu ri Dios ri xc'ason-e ri Jesús chiquicojol ri anima'i', ri xc'ason-e ri Cristo Jesús xtuya' chic ruc'aslen' ri i-cuerpo ri xa can richin vi niq'uis, y ja ri Lok'olaj Espíritu ri c'o pan ivánima ri xtucusaj richin xtuya'.

¹²Romari' rix ri junan kaniman ri Jesucristo iviq'uin, c'o jun kac'as, pero man richin ta chi yekabanala' ri man utz ta ri nurayij ri ka-cuerpo. ¹³Roma si ja ri nurayij ri i-cuerpo ri uc'uayon ivichin, xa camic nuq'uen-pe chive. Pero si riq'uin ruchuk'a' ri Lok'olaj Espíritu nicamisaj ri man utz ta ri nurayij ri i-cuerpo, can xtic'uje' ic'aslen richin jumul.^j ¹⁴Roma conojel ri e'uc'uan roma ri Lok'olaj Espíritu richin ri Dios, jari' ri kitzij eralc'ua'l ri Dios.^k ¹⁵Quiri' nik'alajin roma ri Lok'olaj Espíritu ri yo'on chive, mana-ta jun espíritu ri rix ruximon richin chi nixi'ij chic pe ivi',^l xa jun espíritu ri nu'on chive chi nina' pan ivánima chi rix yo'on chic ka pa rubi' ri Dios, y roma rija' tok Papá^m nkucha' che ri Dios. ¹⁶Roma ja mismo ri Lok'olaj Espíritu nibano chike chi nikana' pa kánima chi kitzij roj ralc'ua'l ri Dios. ¹⁷Y roma roj ralc'ua'l ri Dios, xtuya' chike ri ruyacon-apu richin ntoc kichin,ⁿ y ri ruyacon ri Dios che ri Jesucristo, ja jun roj xkucochin-apu riq'uin. Roma si nikak'asaj k'axomal^o achel ri Jesucristo, xtic'uje' kak'ij achel rija' can c'o ruk'ij.

¹⁸Roma yin ninya' pa cuenta chi ri k'axomal ri nikak'asaj vave' choch'ulef, man juba' rakale'n tok nikajunumaj riq'uin ri nimalaj ruk'ij rija' ri xtik'alajin kiq'uin.^p ¹⁹Roma ronojel ri xu'ij ri Dios chi quec'uje', jani na ntel-e quivech chi coyo'en ri k'ij tok xtik'alajin (e'achique, ajecu'x) ri kitzij ralc'ua'l ri Dios. ²⁰Roma ronojel ri xu'ij ri Dios chi quec'uje', x-an chique chi c'o k'atayon quichin chupan ri nrojo' ri Dios chique. Mana-ta rije' xerayin chi quiri' x-an can chique, xa roma mismo ri Dios nrojo' chi nicoyo'ej ri k'ij petenak, ²¹tok manak chic jun xtek'ato quichin chupan ri nrojo' ri Dios chique, xa xquecolotaj chuveh, richin chi junan quiq'uin ri eralc'ua'l ri Dios xtic'uje' quik'ij. ²²Roma ronojel ri xu'ij ri Dios chi

^f 8:9 1 Co. 3:16; 6:19. ^g 8:9 Jn. 14:17. ^h 8:10 Gá. 2:20; Ef. 3:17; Jn. 17:23.

ⁱ 8:11 Jn. 5:21. ^j 8:13 Gá. 6:8. ^k 8:14 Mt. 5:9; Jn. 1:12; 2 Co. 6:18. ^l 8:15 2 Ti. 1:7; 1 Jn. 4:18. ^m 8:15 Gá. 4:6. ⁿ 8:17 Gá. 4:7; Tit. 3:7. ^o 8:17 Hch. 14:22; 2 Co. 1:5, 7; Fil. 3:10. ^p 8:18 2 Co. 4:17.

quec'uje', c'a vacami junan yejilo y junan yek'axo achel ri k'axomal richin alanic. ²³(Chuka', ka) nkujilo roj ri c'o chic pa tak kánima ri Lok'olaj Espíritu,^q ri na'ey sipanic ruyo'on ri Dios chike, retal chi c'a c'o na más xtuya' chike. Nijilo ri kánima chi koyo'en ri k'ij tok xtitz'akat chi kitzij roj ruyo'on chic ka pa rubi' ri Dios y chi ri ka-cuerpo lok'on chic richin elesan pa ruk'a' ri k'atayon richin chupan ri nrojo' ri Dios che. ²⁴Roma roj richin nikoyo'ej-apu^r ri xtisipes chike tok xojcol, pero tok c'o chic kiq'uin ri koyo'en, manak chic roma c'a nikoyo'ej na, roma ri natz'et chic apu, ¿achique nic'atzin chi c'a navoyo'ej na? ²⁵Pero roma c'a nikoyo'ej na ri man jani tikatz'et, romari' man nik'ax ta kac'u'x chi c'a koyo'en na.

²⁶Ja jun ri Lok'olaj Espíritu nkuruto' tok ri kánima nuna' chi manak ruchuk'a'. Roma roj man keteman ta achique nic'atzin chi nikac'utuj che ri Dios, romari' ri Lok'olaj Espíritu can nijilo chikato'ic riq'uin ri ka-oración^s chuveh ri Dios, riq'uin ch'abel ri manak rubixic choch'ulef. ²⁷Jac'a ri Dios ri ninic'on richin ri kánima,^f k'alaj chuveh ri achique nunojij ri Lok'olaj Espíritu, roma ri ruquemelal ri Lok'olaj Espíritu koma roj ri roj ralc'ua' ri Dios, can jari' mismo nurayij ri Dios pa kavi'.

Man jun nitiquer nkujelesan-e riq'uin ri Dios

²⁸Roj ri nikajo' ri Dios, keteman chi ronojel ri nibanataj pa kac'aslen, rija' nu'on che chi c'o utz nuq'uen-pe chike. Quiri' nu'on kiq'uin roj ri can runojin-vi-pe pa kavi' chi xojroyoj.^u ²⁹Roma ri reteman chic pe quivech,^v ri Dios can erucha'on^w chic pe richin ye'oc achel ri Ruc'ajol,^x richin chi ja ri Ruc'ajol ri achel (nimala'tz, nimalaxel) chique eq'uiy quichak'-quinimal qui'. ³⁰Y ri xerucha', xeroyoj,^y y ri xeroyoj xu'on chique chi manak quimac nicakalej.^z Y ri achok chique xu'on-vi chi manak quimac nicakalej, xu'on chique chi c'o na jun k'ij xtic'uje' quik'ij.

³¹Ronojel re' nuc'ut chikavech chi ri Dios can c'o kiq'uin, y si rija' c'o kiq'uin, man jun nu'on si c'o nicataj-pe chikij. ³²Ri Dios hasta ri mismo Ruc'ajol man xupokonaj ta xuya-pe^a richin (xcom, xquen) koma konojel. Y roma xuya-pe ri Ruc'ajol, ¿achel chi man xtuya' ta ronojel ruveh favores chike? ³³Y man jun nu'on si c'o xtisujun chikij ri roj rucha'on ri Dios,^b roma ja mismo ri Dios banayon chi manak kamac kakalen. ³⁴(Chuka', ka) man jun xtiquer xtic'utun chi tika castigo pa kavi', roma ja ri Jesucristo ri (xcom, xquen), ri xc'astaj-e, ri can c'o-apu pa ru-derecha ri Dios y ri c'o quemelal nuc'utuj-apu koma.^c ³⁵Y man jun xtibano che ri Jesucristo

^q 8:23 2 Co. 5:5; Ef. 1:13. ^r 8:24 2 Co. 4:18; He. 11:1. ^s 8:26 Ef. 6:18.

^t 8:27 Sal. 139:1, 2; Lc. 16:15; 1 Ts. 2:4. ^u 8:28 1 Co. 1:9; Ef. 1:11; 2 Ts. 2:14.

^v 8:29 Jer. 1:5; 1 P. 1:20; 2 Ti. 1:9. ^w 8:29 Ef. 1:5. ^x 8:29 1 Co. 15:49; Col. 3:10; 1 Jn. 3:2.

^y 8:30 1 Co. 1:9; Ef. 4:4; 1 P. 2:9, 21. ^z 8:30 1 Co. 6:11. ^a 8:32 Jn. 3:16; Ro. 5:8.

^b 8:33 Is. 50:8. ^c 8:34 Is. 53:12; He. 7:25; 1 Jn. 2:1.

chi man ta chic nkurojo'; achel ri k'axomal,^d ri nik'axo kánima, ri ni'an pokon chike, ri vayijal, ri manak katziak, ri nkuc'uje' pa c'ayef,^e o ri nkucamises che espada. ³⁶Achel nu'ij juc'an che ruch'abel ri Dios ri tz'iban can:

Roj roma roj avichin tok chi chak'a' chi pak'ij nakaj roje'o-vi che ri camic,

Y ninojix pa kavi' chi roj achel ovejas ri can erichin vi yecamises.^f Quiri' nu'ij ri tz'iban can.

³⁷Pero xa achique na ri nikak'asaj pa kac'aslen, roj más kuchuk'a' nikil richin nkujel chuvech,^g riq'uin ruto'ic ri nojo'on kichin. ³⁸Quiri' nin-ij chive roma cukul nu'u'x chi nis-ta jun achique xtitiquer xtu'on che ri Dios chi man ta chic nkurojo'. Ri camic man nitiquer ta. Ri nikak'asaj pa kac'aslen man nitiquer ta. Ri ángeles man yetiquer ta, nis-ta ri c'o nima'k tak quik'ij pa cak'ik'. Ri espíritu c'o uchuk'a' pa quik'a' man yetiquer ta, ni man jun ri c'o vacami, y nis-ta ri xtipe chikavech apu xtitiquer. ³⁹Ri c'o chicaj man nitiquer ta. Ri c'o pan ulef man nitiquer ta, y nis-ta jun chique ri eruq'uiytisan can ri Dios xtitiquer^h xtu'on chi man ta chic nkurojo', roma xa jun kabanon riq'uin ri Cristo Jesús ri Kajaf.ⁱ

Man conojel ta israelitas eralc'ua'l ri Dios

9 ¹Yin roma xa jun nubanon riq'uin ri Jesucristo nin-ij ri kitzij chive, y man nintz'uc ta tzij. Quiri' mismo nu'ij ri vánima ri uc'uan roma ri Lok'olaj Espíritu, chi ri xtín-ij vacami can kitzij vi,^j ²chi can yibison, y jumul nik'axo ri vánima. ³Roma yin hasta ninrayij chi nika castigo pa nuvi', y chi yineleses-e riq'uin ri Cristo, si jari' nito'on chi yecolotaj ri nuvinak ri aj-nuquiq'uel. ⁴Rije' e-israelitas, x-an chique chi xe'oc rutinamit ri Dios,^k xquitz'et ri nimalaj ruk'ij, quiq'uin rije' xchojmirises-vi chi niquic'ul ru-favor ri Dios si niqui'en ri xu'ij, chique rije' xyo'ox-vi ri ley, xc'ut chiquivech achique ruchojmil niquiya' ruk'ij ri Dios, y jalajoj ruvech favores xsuj chique. ⁵Ri equimama' can, ja ri Abraham, ri Isaac y ri Jacob ri eruxe'el can ri rutinamit ri Dios, y chuk'a' jun quivínak xalex-vi ri Jun ri takon-pe roma ri Dios chucolic ri rutinamit. Ri' ja ri Jesucristo ri can Dios vi^l pa ruvi' ronojel,^m y c'o ruk'ij richin jumul.ⁿ Amén.

⁶Man tinojij chi ri Dios man rubanon ta ri ru'in, xaxe roma man conojel ta ri israelitas quilon ri ru-favor. Roma ri favor ri' xaxe quichin ri kitzij chi erutinamit,^o roma chuvech ri Dios man conojel ta ri eriy-rumam can ri Israel kitzij chi erutinamit. ⁷Nis-ta man roma ta chi eriy-rumam can ri Abraham, can ta romari' kitzij chi erutinamit ri Dios. Man quiri'

^d 8:35 2 Co. 4:8. ^e 8:35 1 Co. 4:11, 12. ^f 8:36 Sal. 44:22. ^g 8:37 Jn. 16:33; 1 Co. 15:57; 1 Jn. 5:4. ^h 8:39 Jn. 10:28. ⁱ 8:39 Col. 3:3. ^j 9:1 Ro. 2:15. ^k 9:4 Os. 1:10; 11:1.

^l 9:5 1 Jn. 5:20. ^m 9:5 Col. 1:16, 17. ⁿ 9:5 Ro. 1:25. ^o 9:6 Ro. 2:28, 29.

ta. Roma ri Dios quire' xu'ij che ri Abraham: Ja chiquicojol ri riy-rumam ri jun ac'ajol rubinan Isaac xquencha-vi ri kitzij xque'oc nutinamit.^p Quiri' xu'ij ri Dios che. ⁸Y riq'uin ri' nikatz'et chi man conojel ta ri eriy-rumam can ri Abraham kitzij chi eralc'ua'l ri Dios. Roma xaxe ri e'alaxnak roma ri rusujun can^q ri Dios, jari' ri kitzij chi eriy-rumam ri Abraham chuvech ri Dios. ⁹Roma ri rusujun can ri Dios che ri Abraham nu'ij: Queva juna' xquipe chic iviq'uin, y ri Sara ri avixayil xtic'uje' jun ch'uti ral ala'.^r ¹⁰Y man xe ta ri' nikil chupan ruch'abel ri Dios, roma ja jun che ri Rebeca c'o xbix tok royo'en chic chi ye'alex ralc'ua'l^s ri kamama' Isaac chuk'a'. ¹¹Tok man jani que'alex ri (santi'i', gemelos) chuk'a', o quibanon ta chic jun utz o man utz ta ri ca'i' ac'ola' chiri', ri Dios richin xuk'alajrisaj chi man nucha' ta jun vinak roma ri yerubanala',^t y richin nuk'alajrisaj chi riq'uin rija' c'o-vi chi yerucha' ri nrojo' yerucha', ¹²xu'ij yan che ri te'ej: Ri (nimala'tz, nimalaxel) xtoc rusamajinel ri ruchak',^u xcha'. ¹³Re' ruc'uan-ri' riq'uin ri ch'abel ri xel pa ruchi' ri Dios ri tz'iban can: Ri Jacob xinlok'ok'ej, jac'a ri Esaú itzel xintz'et.^v Quiri' nu'ij ri tz'iban can.

¹⁴¿Achique c'a nika'ij riq'uin re'? ¿Nu'ij tzij chi ri Dios man pa ruchojmil ta nu'on?^w Man quiri' ta. ¹⁵Achel ru'in can ri Dios che ri Moisés: Ri ninjo' ninpokonaj ruvech, ninpokonaj ruvech. Y ri ninjo' ninjoyovaj ruvech, ninjoyovaj ruvech.^x Quiri' ri ru'in can. ¹⁶Riq'uin re' niketemaj chi riq'uin ri Dios c'o-vi chi nupokonaj kavech, y man roma ta chi roj nikajo' o nikatij kak'ij richin nipokonex kavech. ¹⁷Achel nikil chupan ruch'abel ri Dios ri tz'iban can ri nich'o pa ruvi' ri Faraón, ri quire' nu'ij: Xatinya' chi rey richin tik'alajin chi ri nimalaj vuchuk'a'^y más nitiquer chuvech ri yatajin rat, richin quiri' xtitzijos ri nubi' chi naj chi nakaj. Quiri' xu'ij ri Dios che ri Faraón. ¹⁸Roma c'a ri', riq'uin ri Dios c'o-vi chi nupokonaj ruvech jun vinak, y riq'uin rija' c'o-vi chi nucovirisaj ránima jun vinak.^z

¹⁹Pero riq'uin juba' rat nac'utuj chuve: Si riq'uin ri Dios c'o-vi chi quiri' nu'on riq'uin jun vinak, ¿achique roma nkurucusaj chi roj aj-mac tok xa man jun nitiquer nik'ato chuvech ri achique nrojo' nu'on? yacha'. ²⁰Jac'a rat ri ya'in quiri', ¿rat achique ta c'a rat richin (nach'ojij, nach'oyoquij) che ri Dios ri achique najin riq'uin? Manak che'el chi jun bojo'y nu'ij che ri xbano, chi man nika ta chuvech ri achique rubanic x-an.^a ²¹Roma ri banoy bojo'y c'o ruk'a' che ri ch'abak richin chi riq'uin ri mismo c'olaj ch'abak nu'on jun bojo'y ri utz-utz rubanic, y jun relic bojo'y.^b ²²Quiri' mismo ri Dios, pa ruk'a' c'o-vi ri achique nrojo' nu'on. Rija' masque

^p 9:7 Gn. 21:12; Gá. 4:22, 23; He. 11:18. ^q 9:8 Ro. 4:16; Gá. 3:28.

^r 9:9 Gn. 18:10; 21:2. ^s 9:10 Gn. 25:21, 24. ^t 9:11 Ef. 1:4. ^u 9:12 Gn. 25:23.

^v 9:13 Mal. 1:2, 3. ^w 9:14 Dt. 32:4; 2 Cr. 19:7. ^x 9:15 Ex. 33:19. ^y 9:17 Ex. 9:16.

^z 9:18 Ex. 7:3; Jn. 12:39, 40. ^a 9:20 Is. 29:16; 45:9. ^b 9:21 Jer. 18:6-9; 2 Ti. 2:20.

xrojo' xuc'ut ri royoval y chi can c'o ruchuk'a', pero xerucoch' ri vinak ri xquiyec royoval, ri can eyaquel-vi-apu richin niq'uis quik'ij pa ruk'a' ri royoval. ²³Quiri' xu'on ri Dios richin nik'alajin ri nimalaj rakale'n ri ruk'ij pa quivi' ri nupokonaj quivech^c riq'uin ri ru-favor, ri rubanon chique ojer chi c'o na jun k'ij nie'tuje' quik'ij. ²⁴Rija' eroyon, o más utz nin-ij chi ec'o eroyon chikacojol roj israelitas y ec'o eroyon chiquicojol ri man israelitas ta^d richin nkurucol. ²⁵Achel nu'ij chupan ri ruch'abel ri rutz'iban can ri profeta Oseas:

Ri man enutinamit ta, xtin-ij nutinamit chique,^e

Y ri man yenjo' ta, can xquenjo'.

²⁶Xtibanataj chi xa achique na lugar ec'o-vi tok xbix chique chi rije' man enutinamit ta,

Chiri' mismo xti'ix-vi chique chi eralc'ua'l ri c'aslic Dios.^f

Quiri' nu'ij ri rutz'iban can ri Oseas.

²⁷Ja jun ri Isaías c'o ru'in can chikij roj israelitas. Rija' riq'uin ruchuk'a' xu'ij: Masque roj ri roj riy-rumam can ri Israel roj achel ri (sanayi, sanayil) chuchi' ri mar ri man jun nitiquer najlan kichin, pero xaxe oc jun botzaj xkucolotaj.^g ²⁸Roma ri Ajaf Dios pa ruchojmil y pa jun bey xtuya' castigo pa ruvi' ri roch'u'lef^h achel ri ru'in. ²⁹Ri mismo Isaías quire' xu'ij ojer:

Ri Dios ri Rajaf ronojel ch'utik-nima'k, si man ta xuya' lugar chi ec'o jujun chike roj israelitas ri xec'ase' can,

Xojq'uis yan ta konojel, achel xbanataj quiq'uin ri ca'i' tinamit Sodoma y Gomorra ojer can.ⁱ

Quiri' xu'ij ri Isaías.

Roma kayo'on kánima riq'uin ri Jesucristo tok man jun chic kamac nikakalej chuveh ri Dios

³⁰Ronojel re' nuc'ut chikavech chi ri man israelitas ta masque man quitijon ta pe quik'ij richin man ta jun quimac nicakalej chuveh ri Dios, xa ja rije' xe'ilo chi man jun chic quimac nicakalej, roma xquiya' cánima riq'uin ri Jesucristo.^j ³¹Jac'a ri kavinak israelitas, masque niq'uitij quik'ij chi niq'ui'en ri nu'ij chupan ri ley roma nicajo' chi man jun chic quimac nicakalej chuveh ri Dios, pero man jun bey xetiquer xqui'en. ³²Y, ¿achique roma? Roma man quiyo'on ta cánima riq'uin ri Jesucristo. Xa ja ri achique nu'ij chupan ri ley ri xyo'ox che ri Moisés ri niq'uitij quik'ij chi niq'ui'en richin chi man jun chic quimac nicakalej chuveh ri Dios, y romari' can achel (xquipak'ij,

^c 9:23 Ro. 2:4. ^d 9:24 Ro. 3:29. ^e 9:25 Os. 2:23. ^f 9:26 Os. 1:10; 1 P. 2:10.

^g 9:27 Is. 10:21, 22; Ro. 11:5. ^h 9:28 Dn. 12:1; Mt. 24:21. ⁱ 9:29 Gn. 19:24, 25; Is. 1:9; Jer. 49:18. ^j 9:30 Ro. 1:17.

xquicopij) cakan chuvech abaj.^k ³³Achel nu'ij ri Dios chupan ri tz'iban can:

Titz'eta' na pe!. Yin xtinya' jun abaj pa tinamit Sion, y ri vinak ri (xtupak'ij, xtucopij) rakan chuvech, xtitzak.

Jac'a ri xtuya' ránima riq'uin, man xtiyo'ox ta chi q'uix.^l

Quiri' nu'ij ri tz'iban can.

10 ¹Rix aj-Roma ri junan kaniman ri Jesucristo iviq'uin, ri nurayij ri vánima y ri ninc'utuj che ri Dios, ja chi ri nuvinak israelitas yecolotaj.^m ²Yin veteman chi rije' niqitij quik'ij richin niqitzekle'ej ri Dios, pero man queteman ta achel nitzekle'es. ³Roma quiyon quibanonka che ri cánima chi man queteman ta achique rubeyal nu'on ri Dios richin man ta chic jun quimac nicakalej chuvech,ⁿ xa quiyon quicanonka jun rubeyal, y man nicajo' ta niquinimaj chi ja ri Dios nibano. ⁴Roma riq'uin ri xurubana' ri Jesucristo, xtz'akatitaj ronojel ri nu'ij ri ley,^o richin quiri' xa achique na ri nuya' ránima riq'uin ri Jesucristo,^p man jun chic rumac xtrakalej chuvech ri Dios.

⁵Roma ri Moisés rutz'iban can rubeyal ri nuc'utuj ri ley richin man jun chic rumac nrakalej jun vinak chuvech ri Dios. Chiri' nu'ij: Ri nibano ronojel ri nu'ij ri ley re', xtril ruc'aslen^q riq'uin ri Dios. Quiri' nu'ij ri ley. ⁶Pero vacami ri ruchojmil richin chi jun vinak manak chic rumac nrakalej chuvech ri Dios, ja ri nuya' ránima riq'uin ri Jesucristo. Achel nu'ij ri tz'iban can, ri quire' nu'ij: Man c'a ta'ij pan avánima: ¿Achique ta jun xti'e chicaj richin xterukasaj-pe ri Jun ri nitak-pe chucolic rutinamit ri Dios? ⁷Ni man ta'ij: ¿Achique ta jun xti'e chupan ri lugar quichin ri anima'i' richin nuc'asoj-pe ri Jun ri nitak-pe chucolic rutinamit ri Dios? Man quiri' ta'ij.^s ⁸Roma ri ruch'abel ri Dios ri tz'iban can nu'ij: Man c'ayef ta navetemaj ri ch'abel ri nuc'ut achique ruchojmil nkucolotaj, xa c'o chic pan avánima^t y aveteman chic natzijoj, nicha'. Ri ch'abel ri', can richin vi naya' avánima riq'uin ri Jesucristo, y jari' ri nikatzijoj roj. ⁹Y ri nikatzijoj roj quire' rubeyal: si rat na'ij chi ri Jesús jari' ri Avajaf^u y si nanimaj pan avánima chi ri Dios xuc'asoj-e chiquicojol ri anima'i',^v ri Dios can xcarucol-vi. ¹⁰Roma ja ri pan avánima nanimaj-vi, y riq'uin ri' ri Dios nu'on chave chi man jun chic amac navakalej chuvech, y riq'uin ri ach'abel na'ij chi animan, y riq'uin ri' yacolotaj. ¹¹Roma chupan ruch'abel ri Dios ri tz'iban can, nu'ij: Conojel ri xtiquiya' cánima riq'uin, man xqueyo'ox ta chi q'uix.^w Quiri' nu'ij ri tz'iban can. ¹²Quiri' nu'ij roma ri Dios junan nu'on chike^x roj israelitas quiq'uin ri man israelitas ta. Roma

^k 9:32 Is. 8:14. ^l 9:33 Is. 28:16; Mt. 21:42; 1 P. 2:6, 7. ^m 10:1 Ro. 9:2, 3.

ⁿ 10:3 Ro. 3:21, 22; Fil. 3:9. ^o 10:4 Mt. 5:17. ^p 10:4 Gá. 3:24. ^q 10:5 Lv. 18:5;

Lc. 10:25-28. ^r 10:6 Dt. 30:12. ^s 10:7 1 Co. 15:3, 4. ^t 10:8 Dt. 30:14. ^u 10:9 Fil. 2:11.

^v 10:9 Ro. 4:24. ^w 10:11 Is. 28:16; Jer. 17:7. ^x 10:12 Hch. 15:9.

ja rija' Kajaf konojel,^y y xa achique na yec'utun qito'ic che, rija' can nuya-vi-pe q'uiy favor pa quivi'. ¹³Achel nu'ij chupan ruch'abel ri Dios ri tz'iban can: Conojel c'a ri xquec'utun che ri Ajaf chi querucolo',^z can xquecolotaj-vi, nicha'.

¹⁴¿Pero nitiquer cami jun vinak nuc'utuj che ri Jesucristo chi tucolo', tok man jani tuya' ránima riq'uin? Y, ¿nitiquer cami nuya' ránima riq'uin, tok man rac'axan ta (achique, acu'x) nicolo quichin ri vinak? Y, ¿nitiquer cami nrac'axaj achique ruchojmil nicolotaj, si man jun nitzijon che? ¹⁵Y, ¿achel ni'e jun chutzijosic ruch'abel ri Dios, si manak nitako-erichin? Roma chupan ruch'abel ri Dios nik'alajin chi ec'o etakon, roma nu'ij: Tok nac'axex cakan ri epetenak richin niqitzijoj ri utzulaj ch'abel ri nuya' uxlanen pa tak kánima,^a nu'on chike chi nkuquicot. Quiri' nu'ij ri tz'iban can. ¹⁶Pero man conojel ta niquinimaj ri nu'ij ri utzulaj ch'abel ri nu'ij achique ruchojmil yecolotaj ri vinak. Roma ri rutz'iban can ri Isaías nu'ij: Ajaf, man eq'uiy ta xeniman ri ach'abel ri xkatzijoj chique ri atinamit.^b Quiri' ri rutz'iban can. ¹⁷Romari', richin nalex-pe riq'uin jun vinak chi nuya' ránima riq'uin ri Jesucristo, nic'atzin chi nrac'axaj ri nu'ij ri Dios,^c y c'o che/el nrac'axaj xaxe tok c'o nitzijon ri ruch'abel ri Dios che. ¹⁸Jac'a yin nin-ij chi ac'axan ri ch'abel ri', roma ri tz'iban can nu'ij:

Pa ruvi' ronojel ri roch'ulef nac'axex-vi quikul ri yeyo'on rutzijol,^d

Chi naj chi nakaj ac'axan-vi ri niqui'ij.

Quiri' nu'ij chupan ri tz'iban can.

¹⁹Y yin nin-ij chi ri kavinak israelitas quic'axan ronojel ri'. Na'ey tikatz'eta' ri nu'ij ri Dios chupan ri rutz'iban can ri Moisés. Chiri' nu'ij:

Yin xtin-en chive chi bala ta nijo' chi iviq'uin ta rix c'o-vi ri c'o quiq'uin ri man israelitas ta, ri xa man tinamit ta;

Xtin-en chi nikukut ivánima chiquij ri xa man jun quino'oj pan ivech.^e

Quiri' xu'ij ri Dios chique ri israelitas.

²⁰Pero más k'alaj ri ruch'abel ri Dios ri rutz'iban can ri Isaías, ri quire' nu'ij:

Ri man xecanon ta vichin, xa xinquil.

Xinc'ut-vi' chiquivech ri man xinquicanoj ta.^f

²¹Jac'a chiquij ri kavinak israelitas, ri Dios quire' nu'ij: Ronojel k'ij nin-en-apu nuk'a' chique richin quepe viq'uin, jac'a rije' xa yec'ulula'n-pe y man niquinimaj ta nutzij.^g Quiri' rutz'iban can ri Isaías.

^y 10:12 Hch. 10:36; Gá. 3:28. ^z 10:13 Jl. 2:32; Hch. 2:21. ^a 10:15 Is. 52:7.

^b 10:16 Is. 53:1; Jn. 12:38. ^c 10:17 Gá. 3:2. ^d 10:18 Sal. 19:4; Mt. 24:14; Col. 1:23;

1 Ts. 1:8. ^e 10:19 Dt. 32:21. ^f 10:20 Is. 65:1. ^g 10:21 Is. 65:2.

Ri jun botzaj ri xquecolotaj chiquicojol ri israelitas

11 ¹Vacami c'a, yin nin-ij: ¿Eruxutun cami can ri Dios ri israelitas,^h ri rutinamit? Man quiri' ta. Roma ja jun yin Pablo, yin israelita,ⁱ jun chique ri eruxiquin can ri Benjamín,^j y rija' jun riy-rumam can ri ojer kamama' Abraham. ²Ri Dios man eruxutun ta can ri rutinamit ri xe pa na'ey erucha'on-pe.^k Tuka chi'ic'u'x ri nu'ij chupan ruch'abel ri Dios ri tz'iban can pa ruvi' ri Elías tok xch'o riq'u'in ri Dios chiquij ri ruvinak israelitas, y xu'ij: ³Ajaf Dios, ri altares ri niyo'ox-vi ak'ij xequiyoj ri nuvinak, y ri más chic a-profetas xequicamisaj. Xaxe chic yin yinc'o can, y vacami ja jun yin yinquicanoj richin yinquicamisaj.^l Quiri' xu'ij ri Elías che ri Dios. ⁴Jac'a ri Dios quire' xu'ij che ri Elías: Yin c'a enuyacon na vuku' mil achi'a' ri man jun bey exucul chuveh^m ri tiox Baal richin niquiya' ruk'ij. Quiri' xu'ij-pe ri Dios. ⁵C'a quiri' na mismo ri vacami, c'o jun botzaj kavinak israelitas ri junan roj cha'on quiq'u'in roma ru-favor ri Dios.ⁿ ⁶Y si ri Dios roj rucha'on roma ri ru-favor, chiri' nikatz'et-vi chi man roma ta ri kabanalo'n tok roj rucha'on. Roma si ri Dios nkurucha' roma ri yekabanala', nik'alajin chi ri favor xa man favor ta chic.^o

⁷Re' nu'ut chikavech chi ri kavinak israelitas man quilon ta ri niquicanoj, xa ja ri echa'on roma ri Dios xe'ilo chi man jun chic quimac nicakalej chuveh, y ri ch'aka' chic kavinak, xa xcovirises ri cánima.^p ⁸Achel nu'ij chupan ri tz'iban can: Ri Dios xu'on chique chi achel yever, achel man yetzu'un ta y achel man ye'ac'axan ta.^q Y c'a quiri' na quibanon ri vacami. Quiri' nu'ij ri tz'iban can. ⁹Ja jun ri David quire' ru'in can:

Ri va'in ri benak cánima pa ruvi', can ta xtoc-ka (quipata'y, qui-trampa), y can ta achel jun colo' ri niquirarij-ka-qui' chupan.

Can ta jari' xtitzako quichin y xtoc-ka qui-castigo.

¹⁰ Can ta xtik'uk'umer ri runak' tak quivech, richin man ta xquetzu'un.

Can ta xtiluculu' quij chuxe' ri yequibanala' y man ta chic xtichojmiritaj.^r

Quiri' ri ru'in can ri David.

Xjakataj ri bey richin yecolotaj ri man israelitas ta

¹¹Ri yitajin chubixic chive jare': Ri nuvinak israelitas man richin ta jumul xetzak can tok (xquipak'ij, xquicopij) cakan. Pero riq'u'in ri xetzak,

^h 11:1 1 S. 12:22. ⁱ 11:1 2 Co. 11:22. ^j 11:1 Fil. 3:5. ^k 11:2 Ro. 8:29. ^l 11:3 1 R. 19:10.

^m 11:4 1 R. 19:18. ⁿ 11:5 Ro. 9:27. ^o 11:6 C'o ch'aka' versiones quire' rutz'akat niquiya' ri versículo re': Y xa ta roma ri yekabanala' tok roj rucha'on, ri' nu'ij tzij chi man favor ta chike, y si nika'ij chi xa favor, ri' nu'ij tzij chi man jun rakale'n nika'an che ri ekabanalo'n.

^p 11:7 2 Co. 3:14. ^q 11:8 Dt. 29:4; Is. 6:9; 29:10; Jer. 5:21; Ez. 12:2.

^r 11:10 Sal. 69:22, 23.

xjakataj ri bey richin yecolotaj ri man israelitas ta,^s richin quiri' nicataj-pe cánima ri nuvinak richin niquirayij niquinimaj^t ri Jesucristo. ¹²Ri nuvinak israelitas xetzak can, xa xquixutuj can ri Dios, pero riq'uin ri quiri' xqui'en, xuq'u'en-pe beyomal pa cánima ri más chic vinak choch'ulef, y ri' ja ri man israelitas ta. Vacami c'a, jtinojij na pe' rix ri ajani chic más beyomal xtuq'u'en-pe tok ri nuvinak xtiq'uiya' cánima riq'uin ri Jesucristo!

¹³Jac'a ri vacami chive rix ri man rix israelitas ta yich'o-vi: Yin, yin jun apóstol ri yin takon-pe chi'icojol,^u y chuve yin, c'o ruk'ij re samaj re yo'on chuve. ¹⁴Roma riq'uin ri samaj re', riq'uin juba' ninc'asoj cánima ri nuvinak richin can ta nicajo' niquic'ul ri ic'ulun rix ri man rix israelitas ta, y yecolotaj^v jujun chiquicojol. ¹⁵Roma si riq'uin ri xexutux can rije' roma ri Dios, nic'ul quivech conojel quivech vinak, tinojij na pe' ri ajani chic más utz xtuq'u'en-pe tok ri nuvinak xtiq'uiya' cánima riq'uin ri Jesucristo y nic'ul chic quivech; can achel jun ámna nic'astaj chic pe.^w ¹⁶Ri nuvinak israelitas can echa'on-vi pa na'ey, y quiri' mismo xti'an chique ri equiy-quimam. Nintzijo na pe ca'i' ejemplo chivech: Si ri na'ey pan ri ntel riq'uin jun c'olaj que'en nijach chuvech ri Dios, ronojel ri que'en richin ri Dios. Quiri' mismo jun mata che'. Si ri ruxe' ocunak richin ri Dios, ronojel ri ruk'a' ri xqueq'uiy-pe, xque'oc richin ri Dios.

¹⁷Roma c'a ri', masque ri nuvinak israelitas e'achel ruk'a' jun mata olivo ri can ticon-vi-ka, pero xa ec'o chique ri xejok'-e.^x Y rat ri man rat israelita ta ri rat achel ruk'a' jun mata olivo ri xa ruyon elenak-pe, si xatic-ka pa ruvi' ri olivo ri can ticon-vi-ka, y si romari' vacami c'o ak'a' che chi najik'aj ruqui'l ruk'olil ruxe' ri olivo ri can ticon-vi-ka, ¹⁸man c'a tana-avi' chi c'o ak'a'^y richin nakasaj quik'ij ri nuvinak ri xejok'olo'-x-e. Y si nana' chi c'o ak'ij, man tamestaj chi jun che' mana-ta ri ruk'a' uc'uayon richin ri ruxe', xa ja ri ruxe' uc'uayon quichin ri ruk'a'. ¹⁹Man c'a quire' tik'ax pan avánima: Ri ruk'a' ri olivo ri ticon, xejok'olo'-x-e richin chi ja yin xiyo'ox can pa quiq'uexel. Man tanojij quiri'. ²⁰Can kitzij vi chi ri nuvinak israelitas, roma man xquiya' ta cánima riq'uin ri Jesucristo tok xe'eleses-e, y rat roma xaya' avánima riq'uin ri Jesucristo, ratc'o can pa quiq'uexel. Pero rat, man tana-ka-avi' chi can c'o ak'ij,^z xa taxi'ij-avi'^a chuvech ri Dios. ²¹Roma ri Dios man xerupokonaj ta ri nuvinak israelitas, xa xerelesaj-e roma man xeniman ta, y ri' masque rije' eruk'a' ri olivo ticon-ka. Quiri' mismo rat man xcarupokonaj ta si man yaniman ta. ²²Tavetemaj c'a ru-modo ri Dios. Rija' utz runo'oj, pero (chuka', ka) nuya' castigo. Ri nuvinak ri xexutun-e chuvech, xerelesaj-e, jac'a rat ri

^s 11:11 Hch. 28:28. ^t 11:11 Ez. 33:11. ^u 11:13 Hch. 9:15. ^v 11:14 1 Co. 9:22; Stg. 5:20.

^w 11:15 Lc. 15:24-32. ^x 11:17 Jer. 11:16. ^y 11:18 1 Co. 10:12. ^z 11:20 Ro. 12:16.

^a 11:20 Fil. 2:12.

ayo'on avánima riq'uín, utz runo'oj rubanon aviq'uín; pero si rat naxutuj can ri utzulaj runo'oj aviq'uín,^b ja jun rat xcarelesaj-e. ²³ Pero ri nuvinak israelitas ri e'achel ruk'a' ri olivo ri ejok'on-e, si xtiqijal quino'oj y niquiya' cánima riq'uín ri Jesucristo, ri Dios xquerutic chic ka jun bey pa ruvi' ri olivo^c ri ejok'onak-vi-e, roma rija' can c'o uchuk'a' pa ruk'a' richin yerutic chic ka. ²⁴ Roma rat ri rat achel ruk'a' ri olivo ri xa ruyon elenak-pe, x-an chave ri man jun bey ni'an riq'uín jun kitzij che'. Roma rat xatekupix-pe richin xatic-ka pa ruvi' ri kitzij olivo. Y si quiri' x-an chave, más man c'ayef ta chi yetic chic ka ri kitzij eruk'a' ri olivo pa ruvi' ri can ruche'el vi.

Can c'a xquecolotaj na vi ri israelitas

²⁵ Vacami c'a, rix ri junan kaniman ri Jesucristo iviq'uín, yin man ninjo' ta chi man ta iveteman ri c'a juba' tuk'alajrisaj ri Dios, richin quiri' man xa tina-ka-ivi' chi can rix utz. Roma ri Dios ruk'alajrisan chi ec'o chique ri nuvinak israelitas xcovir ri cánima, y c'a quiri' na xquec'uje', c'a quecolotaj na conojel ri man israelitas ta^d ri can richin vi yecolotaj. ²⁶ Tok quiri' xtibanataj, xquecolotaj conojel ri nuvinak israelitas,^e achel nu'ij ri tz'iban can:

Ri Colonel xtipe pa tinamit Sion,

Y xtuya' pa cánima ri eriy-rumam can ri Jacob chi man chic tiqui'en chi manak Dios pa quivech.

²⁷ Y juc'an chic ri Dios nu'ij:

Ja c'ac'ac' ruvujil c'aslen re' ri xtín-en quiq'uín,^f

Tok xtínvelesaj ri quimac.

Quiri' nu'ij ri Dios chupan ri tz'iban can.

²⁸ Achel rubanon vacami, ri nuvinak quixutun can ri Dios roma man niquinimaj ta ri utzulaj ch'abel ri nu'ij achique ruchojmil yecolotaj, pero ri' c'o utz xuq'uén-pe chive rix ri man rix israelitas ta. Jac'a chi ri nuvinak echa'on, can echa'on-vi roma ri Dios, y can (ye'ojovex, yejo'ox) vi roma ri xsuj chique ri ojer tak kati't-kamama'.^g ²⁹ Roma ri Dios tok nu'ij chi c'o nusipaj, y tok ec'o yeroyoj richin ye'oc rutinamit, man jun bey nutzolij rutzij.^h ³⁰ Rubanon can, rix ri man rix israelitas ta man yixniman ta chuveh ri Dios.ⁱ Jac'a ri vacami, ivilon rupokonaxic ivech, roma ja yan chic ri nuvinak ri man yeniman ta chuveh ri Dios. ³¹ Quiri' mismo ri nuvinak israelitas man yeniman ta chuveh ri Dios vacami, richin quiri' riq'uín ri xpokonex ivech rix, ja jun rije' niquil rupokonaxic quivech. ³² Roma ri Dios xuk'alajrisaj chi

^b 11:22 Jn. 15:2, 6; 1 Co. 15:2; Jud. 21. ^c 11:23 2 Co. 3:16. ^d 11:25 Lc. 21:24; Ro. 9:18.

^e 11:26 Sal. 14:7; Is. 59:20. ^f 11:27 Jer. 31:31; He. 8:10; 10:16. ^g 11:28 Dt. 7:8; 10:15.

^h 11:29 Nm. 23:19. ⁱ 11:30 Ef. 2:1, 2.

conojel vinak can man yeniman ta vi.^j Quiri' xu'ij richin nupokonaj quivech conojel.

³³ ¡Can jun nimalaj beyomal ri ajani runo'oj y ri ajani reteman ri Dios! Nis-ta jun nitiquer nretaj ri ajani no'oj c'o riq'uin,

Ri yerubanala!^k rija' nis-ta jun aj-roch'ulef (xtik'ax, xtino') chuveh.^l

³⁴ Achel nu'ij ri tz'iban can: ¿Achique ta jun (nik'ax, nino') chuveh ri achique nunojij ri Ajaf Dios?^m

Y, ¿achique ta jun nitiquer ni'in che ri Dios ri achique utz chi nu'on?ⁿ

³⁵ Y, ¿achique ta jun nitiquer ni'in chi can c'o rusipan che ri Dios, y romari' ri Dios c'o ruc'as riq'uin? Man jun.

Quiri' nu'ij ri tz'iban can.

³⁶ Roma ja rija' xbano ronojel.^o Ja rija' uc'uayon ronojel. Y ronojel ri xu'on, richin niquiya' ruk'ij tok ec'o. ¡Can tiyo'ox c'a ruk'ij ri Dios richin jumul! Amén.

Ri achique chi c'aslen nic'atzin niquic'uaj ri ralc'ua'l ri Dios

12 ¹ Vacami c'a, roma ri Dios nupokonaj kavech, romari' rix ri junan kaniman ri Jesucristo iviq'uin, yixinbochi'ij chi c'aslic ik'a-ivakan tijacha-ivi!^p chi sipanic chuveh ri Dios, jun sipanic ri can lok'olaj vi y nika chuveh rija'. Jari' ri nic'atzin chi ni'en richin niya' ruk'ij. ² Man ti'en rix achel niqui'en ri vinak ri c'a benak na cánima pa ruvi' ri roch'ulef, xa tiya' lugar chi ni'an c'ac'ac' che ri achique ninojij,^q richin quiri' nijal rubanic ri ic'aslen. Y quiri' xtivetemaj achique nrojo' ri Dios chive; xtivetemaj achique ri utz chi ni'en, ri achique nika chuveh, y xtivetemaj rubanic ri c'aslen tz'akat chuveh rija'.

³ Yin, riq'uin ri utzulaj favor banon chive roma ri Dios, nin-ij chive chi'ijununal: Man tina-ka-ivi' chi más c'o ik'ij que chuveh ri rubanon ri Dios chive. Pa ruq'uexel ri', pa ruchojmil tinojij chi'ijununal achique kitzij-kitzij ibanic, y ri ninojij, can ta uc'uau roma ri ajani cukul ic'u'x riq'uin ri Dios, achel rujachon chive chi'ijununal.^r ⁴ Y achel jun cuerpo c'o jalajoj rutz'akat,^s pero man junan ta quisamaj chiquijununal, ⁵ quiri' mismo roj ri kayo'on kánima riq'uin ri Jesucristo can roj q'uiy, pero xa jun cuerpo kabanon riq'uin,^t y konojel nikato-ki' riq'uin ri samaj nika'an chikajununal chupan ri cuerpo ri'. ⁶ Kac'ulun ri ru-favor ri Dios riq'uin ri jalajoj ruveh uchuk'a' ruyo'on chike^u chiquito'ic ri ch'aka' chic ruk'a-rakan ri cuerpo. Romari', si yo'on che jun chi nuya' rubixic ri nu'ij-pe ri Dios pa ránima,^v can ta riq'uin ri ajani cukul ruc'u'x nu'on-vi. ⁷ Si yo'on

^j 11:32 Ro. 3:9; Gá. 3:22. ^k 11:33 Dt. 29:29; Job 11:7. ^l 11:33 Sal. 92:5.

^m 11:34 Job 15:8. ⁿ 11:34 Is. 40:13, 14; 1 Co. 2:16. ^o 11:36 1 Co. 8:6; Col. 1:16; He. 2:10.

^p 12:1 1 Co. 6:13. ^q 12:2 Ef. 1:18; Col. 3:10. ^r 12:3 Ef. 4:7. ^s 12:4 1 Co. 12:12-14;

Ef. 4:4, 16. ^t 12:5 1 Co. 12:20, 27. ^u 12:6 1 Co. 12:4; 1 P. 4:10, 11. ^v 12:6 1 Co. 12:10.

che chi yeruto' ri quiniman ri Jesucristo, queruto' c'a. Si richin yerutijoj, querutijoj c'a. ⁸Si richin nuya' ruchuk'a' ri cánima, tuya' c'a.^w Si richin yeruto' riq'uin ri nic'atzin chique, tuya' riq'uin ronojel ránima. Si yo'on che chi rija' uc'uay bey chiquivech, utz queruc'uaj,^x y si richin nupokonaj quivech, tiquicot queruto'.

⁹Riq'uin ronojel ivánima quixojo'on, y man riq'uin ca'i' ipalaj. Tiya' can jumul ri man utz ta' y ja ri utz ri titzekle'ej. ¹⁰Tijo-ivi' chivech achel can ta ichak'-inimal ivi', y tik'alajin ivi'uin chi'ijununal chi can kitzij nitij ik'ij chi más ye'iyá' pa cuenta ri ch'aka' que chivech rix.^z ¹¹Ri nic'atzin chi ni'an, can tibana', man quixk'oran; tiq'uenc'ot ri ivánima chupan rusamaj ri Ajaf. ¹²Tiq'uenc'ot ivánima tivoyo'ej ri favor ri xtuya' ri Dios,^a ticoch'o' ri k'axomal ri nik'asaj, man quixtane' chi ni'en orar. ¹³Que'ito' ri quiniman ri Ajaf ri nic'atzin quito'ic, tiya' qui-posada tok nic'atzin.^b

¹⁴Tic'utuj ru-favor ri Dios pa quivi' ri yebano pokon chive.^c Tic'utuj favor pa quivi', y mani nic'utuj castigo. ¹⁵Quixquicot quiq'uin ri yequicot, y quixok' quiq'uin ri ye'ok'.^d ¹⁶Junan ivánima tibana'^e chi'ivonojel. Man tina-ka-ivi' chi más c'o ik'ij,^f xa junan ivánima tibana' quiq'uin ri manak oc quik'ij, y man tinojij chi más q'uiy iveteman chiquivech ri ch'aka' chic. ¹⁷Ri nibano jun pokon chive, rix man titzolij ruq'uexel.^g Titija' ik'ij chi ja ri utz chiquivech conojel ri ni'en. ¹⁸Tibana' ri ajani yixtiquer ni'en richin utz nic'uaj-ivi' quiq'uin conojel.^h ¹⁹Rix aj-Roma ri can yixinjo', nin-ij c'a chive: Si c'o jun pokon ni'an chive, man ti'en ruq'uexel,ⁱ xa tivoyo'ej chi ja ri Dios niyo'on ruq'uexel, roma ri tz'iban can quire' nu'ij: Pa nuk'a' yin c'o-vi ri castigo y ja yin yiyo'on ruq'uexel chique ri yebano mac.^j Quiri' nu'ij ri Ajaf. ²⁰Romari', si nivayijan ri vinak ri itzel yarutz'et, tatzuku'. Si c'o ruchakij-chi', tasipaj ruya'.^k Riq'uin ri quiri' xta'an, rija' xa ruyon xtiq'uix roma ri achique rubanon chave. Quiri' nu'ij chupan ri tz'iban can. ²¹Man taya' lugar chi yach'acataj roma ri man utz ta ri ni'an chave. Xa tach'aca' ri man utz ta riq'uin favor.

13 ¹Nic'atzin chi conojel niquinimaj xa achique na chi autoridad ri yo'on pa quivi'.^l Roma ronojel autoridad ja ri Dios yayon, y ri ec'o, ja rija' yayon uchuk'a' pa quik'a'.^m ²Roma c'a ri', ri nupaba-ri' chuvech ri autoridad, xa chuvech ri ruyo'on can ri Dios nupaba-vi-ri'. Y ri quiri' yebano, quiyon nicoyoj-ka castigo pa quivi'. ³Roma ri yebano gobernar man eyo'on ta richin niqui'en chique ri ebanoy ri utzⁿ chi niquixi'ij-qui', xa richin tiquixi'ij-qui' ri ebanoy ri man utz ta. Romari',

^w 12:8 Hch. 15:32. ^x 12:8 Hch. 20:28. ^y 12:9 Am. 5:15; 1 Ts. 5:22. ^z 12:10 Fil. 2:3; 1 P. 2:17. ^a 12:12 He. 10:36. ^b 12:13 He. 6:10. ^c 12:14 Mt. 5:44. ^d 12:15 Job 30:25.
^e 12:16 Ro. 15:5. ^f 12:16 Sal. 131:1; Pr. 3:7. ^g 12:17 Pr. 20:22; Mt. 5:39.
^h 12:18 Ro. 14:19. ⁱ 12:19 Lv. 19:18. ^j 12:19 Dt. 32:35; He. 10:30.
^k 12:20 Pr. 25:21, 22; Mt. 5:44; Lc. 6:27. ^l 13:1 Tit. 3:1; 1 P. 2:13. ^m 13:1 Pr. 8:15; Dn. 2:21; 4:32; Jn. 19:11. ⁿ 13:3 1 P. 2:14.

richin chi rat manak roma naxi'ij-avi', tabana' ri utz, y utz xcatz'etetaj coma. ⁴Roma ri nibano gobernar, jun rusalemajinel ri Dios richin favor chave. Pero si man utz ta ri yatajin, taxi'ij-avi', roma c'o ruk'a' richin yaru'on castigar; rija' rusalemajinel ri Dios richin nuya' ruq'uexel chique ri yebano ri man utz ta. ⁵Romari' nic'atzin chi rix ninimaj rutzij,^p man xe ta richin man tika castigo pan ivi', xa roma chi ri ivánima nuna' chi nic'atzin yixniman tzij. ⁶Ja roma ri' nitoj impuestos, roma ri yebano gobernar, erusalemajela' ri Dios chuc'uaxic ri tinamit ronojel k'ij. ⁷Ronojel ri nic'atzin chi nikaya' chique ri yebano gobernar, tikaya' c'a. Xa achique na ruvech impuesto yo'on pa kavi', tikaya'.^q Ri nic'atzin chi yekanimaj, quekanimaj c'a, y ri can c'o quik'ij, tikaya' quik'ij.

⁸Man utz ta chi c'o ic'as, xa titojo'. Pero c'o jun c'as ri can utz vi chi nivakalej, y ri' ja chi nijo-ivi' chivech.^r Roma ri yerojo' conojel, najin riq'uin ronojel ri nuc'utuj ru-ley ri Dios. ⁹Ri ley ri' nu'ij: Man tac'amalaka-avi' riq'uin jun ri mana-ta achok riq'uin rat c'ulan-vi. Man cacamisan. Man catelak'. Man tatz'uc tzij chirij jun chic. Man tarayij ri achique c'o riq'uin jun chic. Y c'o chic ch'aka' ri nu'ij ri ley. Pero ronojel re' numaj ri mandamiento ri nu'ij: Achel najo-ka-avi' rat, quiri' mismo que'ajo' conojel.^s ¹⁰Ri najo' jun chic, man jun itzel na'an che. Romari', si yatojo'on pan avánima, yatajin riq'uin ronojel ri nuc'utuj ru-ley^t ri Dios.

¹¹Ronojel re' nin-ij, richin tikajaka' utz ri runak' tak kavech,^u roma keteman chi nuka yan ri k'ij tok xkucolotaj-e. C'o chic chi k'ij kayo'on kánima riq'uin ri Jesucristo, y romari' nkutiquer nika'ij chi vacami más nakaj chic c'o-vi ri k'ij chi nkucolotaj-e. ¹²Ri k'eku'n richin ri ak'a' nik'ax yan, y xa ntel yan pe ri k'ij. Romari', man chic quekabanala' ri xa richin ri k'eku'n, xa tikavika-ki' riq'uin ri samajbel richin ri sakil.^v ¹³Tikac'uaj jun c'aslen ri can richin vi ri sakil.^w Man tikaju-ki' chupan tak nimak'ij richin k'abaric,^x ni man tikacusaj ri ka-cuerpo chupan tak mac ri niquiyec q'uix. Man utz ta chi c'o oyoval chikacojol y man utz ta chi itzel nikatz'et jun chic xaxe roma utz c'o.^y ¹⁴Nic'atzin chi nivik-ivi' riq'uin ri runo'oj ri Ajaf Jesucristo,^z y man tiya-ivi' pa ruk'a' ri mac ri ye'alex-pe pan ivánima.^a

Quekato' ri man can ta c'o ruchuk'a' cánima chirakan ri Ajaf

14 ¹Ri man can ta c'o ruchuk'a' cánima riq'uin ri Jesucristo,^b jabel tic'ulu' quivech, pero man richin ta chi ni'en oyoval quiq'uin pa

^o 13:4 1 Ts. 4:6. ^p 13:5 Ec. 8:2; 1 P. 2:19. ^q 13:7 Mt. 22:21; Mr. 12:17; Lc. 20:22-25.

^r 13:8 Gá. 5:14; Col. 3:14; Stg. 2:8. ^s 13:9 Lv. 19:18; Mt. 22:39; Lc. 10:27.

^t 13:10 Mt. 22:37-40. ^u 13:11 Ef. 5:14; 1 Ts. 5:6. ^v 13:12 2 Co. 10:4; Ef. 5:11;

6:13. ^w 13:13 1 Ts. 4:12. ^x 13:13 Lc. 21:34; Gá. 5:15; Ef. 5:18. ^y 13:13 Stg. 3:14.

^z 13:14 Gá. 3:27; Col. 3:12. ^a 13:14 Gá. 5:16; 1 P. 2:11. ^b 14:1 1 Co. 8:9; 9:22.

ruvi' ri man junan ta niquinojij iviq'uin. ²Por ejemplo, ec'o ch'aka' niqui'ij chi utz yetij ronojel, y ec'o ri man can ta c'o ruchuk'a' cánima riq'uin ri Jesucristo niqui'ij chi xaxe ichaj ri utz yequitij.^c ³Pero ri nutij ronojel, man itzel tutz'et ri man nutij ta ronojel,^d y ri xaxe ichaj nutij, man tich'o chirij ri nutij ronojel, roma ri Dios ruc'ulun ruvech. ⁴Roma, ¿rat achique ta c'a rat richin yach'o chirij jun ri man rat ajaf ta pa ruvi'? Roma xaxe ri rajaf ri samaj xti'in si ri samajinel utz o man utz ta ri najin riq'uin,^e y ri Ajaf Jesucristo can c'o ruchuk'a' richin nu'on che ri rusamajinel ri' chi cof nipa'e' chirakan.

⁵Chiquivech ch'aka', c'o k'ij ri xe relic k'ij, y c'o k'ij ri c'o cakale'n, yecha'.^f Jac'a chiquivech ch'aka' chic, ronojel k'ij xa junan. Romari' kiq'uin roj chikajununal c'o-vi chi nikanojij utz-utz ri achique nic'atzin chi nika'an. ⁶Ri c'o rucojol ri k'ij chiquivech, quiri' niqui'en richin niquiya' ruk'ij ri Ajaf, y ri xa junan ronojel k'ij chiquivech, quiri' niqui'en richin niquiya' ruk'ij ri Ajaf. Ri niqutij ronojel, richin niquiya' ruk'ij ri Ajaf tok niqutij, roma niqumatioxij che;^g y ri man niqutij ta ronojel, richin niquiya' ruk'ij ri Ajaf tok man niqutij ta, y niqumatioxij che ri ajani niqutij. ⁷Roj man jun kak'a' che ri c'aslen richin nika'an ri nika chikavech, y quiri' mismo man jun kak'a' che ri camic. ⁸Roma si c'a nkuc'ase' na, nkuc'ase' richin nikanimirisaj rubi' ri Ajaf. Y si (nkucom, nkuquen), richin nikanimirisaj rubi' riq'uin ri kacamic. Roma c'a ri', si c'a roj q'ues na, roj richin rija', y si roj caminak chic, roj richin rija'.^h ⁹Roma ri Jesucristo (xcom, xquen) y xc'astaj chic, richin xoc Cajafⁱ ri ecaminak chic e y Cajaf ri c'a eq'ues na.

¹⁰Roma c'a ri', rat ri na'ij chi ronojel utz chi na'an, ¿achique roma yach'o chirij jun ri junan runiman ri Jesucristo aviq'uin? Y rat ri na'ij chi man ronojel ta utz, ¿achique roma itzel natz'et ri avach'alal? Man tamestaj chi konojel c'o na jun k'ij nkujepa'e' chuvech ri Jesucristo richin ninic'ox ri kánima.^j ¹¹Keteman chi quiri', roma ri tz'iban can nu'ij:

Ri Ajaf Dios nu'ij: Achel ri nuc'aslen can kitzij chi c'o, quiri' mismo chi can kitzij chi conojel vinak xquexuque' chinuvech,

Y xtiq'ij chi ja yin ri Dios.^k

Quiri' nu'ij ri tz'iban can.

¹²Y romari' keteman chi c'o na jun k'ij tok chikajununal xteka'ij chuvech ri Dios^l ri xka'an pa kac'aslen.

¹³Romari' chikacojol roj ri kaniman ri Jesucristo, man chic kuch'o chikij. Pa ruq'uexel ri', tikatija' kak'ij chi man ta koma roj ri ch'aka'

^c 14:2 1 Co. 10:25. ^d 14:3 Col. 2:16; Ro. 14:13. ^e 14:4 Stg. 4:12. ^f 14:5 Gá. 4:10.

^g 14:6 1 Co. 10:31; 1 Ti. 4:3, 4. ^h 14:8 Fil. 1:20; 1 Ts. 5:10. ⁱ 14:9 Hch. 10:36; 2 Co. 5:15.

^j 14:10 Mt. 25:31-33; 2 Co. 5:10. ^k 14:11 Is. 45:23; Fil. 2:10, 11. ^l 14:12 Mt. 12:36;

1 P. 4:5.

chic niqul jun roma chi niquixutuj can ri Dios, o roma ri yekabanala' yekatakchi'ij pa mac.^m ¹⁴Y roma yin xa jun nubanon riq'uin ri Ajaf Jesús, romari' veteman chi man jun achique netzelan ri c'aslen.ⁿ Pero ri nunojij chi c'o netzelan ri c'aslen, chuech rija' can itzel vi c'a ri!.^o ¹⁵Y si roma ri achique natij, niyojtaj ránima jun ri junan runiman ri Ajaf aviq'uin, chiri' nik'alajin-vi chi xa man yatojo'on ta pan avánima. Man c'a ta'an chi roma ri natij, nisatz can jun ri achok roma (xcom, xquen) ri Jesucristo.^p ¹⁶Tibana' cuenta chi ri utz chivech rix chi ni'en, man xa c'o yebano tzij chirij.^q ¹⁷Roma ri ru-gobierno ri Dios pa tak kánima, man riq'uin ta ri yekatij o yekakum' nik'alajin-vi, xa riq'uin chojmilaj c'aslen, riq'uin uxlanen chikacojol, y riq'uin nkuquicot roma c'o ri Lok'olaj Espíritu pa kánima.^s ¹⁸Ri quiri' nu'on pa ruc'aslen richin nu'on ri nrojo' ri Jesucristo, can nika chuech ri Dios y utz rutzijol chiquicojol ri vinak.^t ¹⁹Romari', tikatzekle'ej rij ri nito'on chi c'o uxlanen chikacojol^u y ri nito'on chi niq'uiy ri kac'aslen chirakan ri Dios.^v ²⁰Man tayo'j ri samaj rubanon ri Dios pa ránima jun chic riq'uin ri achique ye'atij. Can kitzij vi chi ronojel utz richin yetij, pero man utz ta chi roma ri natij, na'an che jun chic chi nril jun roma chi nuxutuj can ri Dios.^w ²¹Más utz man natij ti'lj, ni man takum vino, ni man ta'an ri nu'on che jun ri junan runiman ri Jesucristo aviq'uin chi nril jun roma chi nuxutuj can ri Dios, chi nik'axo ránima o chi caca' ruc'u'x nu'on-ka.^x ²²Si rat cukul ac'u'x chi chuech ri Dios xa utz ri yatajin riq'uin, man nic'atzin ta na'ij chique ch'aka' chi quiri' mismo tiquibana'. Utzulaj tzij ri', ri nuna' pa ránima chi ronojel ri najin riq'uin xa utz chuech ri Dios.^y ²³Pero ri xa caca' ruc'u'x pa ruvi' ri nutij, xa mac nu'on, roma man cukul ta ruc'u'x chi xa utz chuech ri Dios. Y ronojel ri yatajin si man cukul ta ac'u'x chi utz nutz'et ri Dios, xa mac.

15 ¹Roma c'a ri', roj ri c'o chic ruchuk'a' ri kánima riq'uin ri Jesucristo, nic'atzin chi yekacoch^z ri man can ta c'o ruchuk'a' cánima riq'uin rija', y mani nika'an xaxe ri nika chikavech roj. ²Chikajununal tikabana' ri nika chiquivech ri junan kaniman ri Jesucristo quiq'uin,^a ri c'o utz nuq'uen-pe chique richin niq'uiy ri quic'aslen chirakan ri Dios.^b ³Roma hasta ri Jesucristo man xu'on ta xaxe ri xka chuech rija', xa xuk'asaj k'axomal coma ch'aka' chic. Achel nu'ij ri tz'iban can: Ri itzel tak tzij xequibila' ri vinak chave richin xatquiya' chi q'uix, xa chuvij yin xeka-vi.^c Quiri' xu'ij ri Jesucristo che ri Dios. ⁴Y ronojel ruch'abel ri Dios ri tz'iban can, richin chi roj c'o niketemaj chirij,^d

^m 14:13 1 Co. 8:9; 10:24. ⁿ 14:14 Hch. 10:15. ^o 14:14 1 Co. 8:7. ^p 14:15 1 Co. 8:11.

^q 14:16 Ro. 12:17; 2 Co. 8:21. ^r 14:17 1 Co. 8:8. ^s 14:17 Ro. 15:13. ^t 14:18 2 Co. 8:21.

^u 14:19 Sal. 34:14; Ro. 12:18; He. 12:14. ^v 14:19 1 Co. 14:12; Ef. 4:12, 29.

^w 14:20 1 Co. 8:9-12. ^x 14:21 1 Co. 8:13. ^y 14:22 1 Jn. 3:21. ^z 15:1 Ro. 14:1; Gá. 6:1, 2.

^a 15:2 1 Co. 9:19; Fil. 2:4. ^b 15:2 Ro. 14:19. ^c 15:3 Sal. 69:9. ^d 15:4 2 Ti. 3:16, 17.

richin quiri' nkucoch'on y nikil ruchuk'a' kánima richin nikoyo'ej-apu ronojel ri rusujun ri Dios chike. ⁵Y ri Dios ri nibano chike chi nkucoch'on y chi nikil ruchuk'a' kánima, can ta xquixruto' chi junan ivánima ni'en,^e achel ri ruc'utun can ri Cristo Jesús chikavech, ⁶richin quiri' can ta junan y xa jun itzij niya' ruk'ij ri Dios ri Rutata' ri Kajaf Jesucristo.

**Nitzijos chique ri man israelitas ta ri utzulaj
ch'abel ri nu'ij achique ruchojmil yecolotaj**

⁷Roma c'a ri', utz tic'ulu-ivi' chivech, achel xuc'ul kavech ri Jesucristo, richin chi ri Dios xtiyo'ox nimalaj ruk'ij ivoma. ⁸Quiri' nin-ij chive, roma ri Jesucristo xpe chikato'ic roj israelitas ri banon ri circuncisión chike,^f richin xuc'ut chikavech chi ri Dios can nu'on-vi ri ru'in,^g (chuka', ka) richin yebanataj ronojel ri xusuj chique ri kati't-kamama' ojer can, ⁹y richin niyo'ox ruk'ij coma ri man israelitas ta roma xupokonaj quivech. Achel nu'ij ri David chupan ruch'abel ri Dios ri tz'iban can:

Can xtinya' ak'ij junan quiq'uin ri man israelitas ta,
Y xtinbixaj ri abi'.^h

¹⁰Y juc'an chic ri ruch'abel ri Dios nu'ij:

Rix ri man rix israelitas ta, quixquicot quiq'uin ri israelitas, ri
rutinamit ri Dios.ⁱ

¹¹Y juc'an chic ri ruch'abel ri Dios quire' nu'ij:

Tiya' ruk'ij ri Ajaf chi'ivonojel rix ri man rix israelitas ta.
Conojel tinamit tiquiya' ruk'ij ri Dios.^j

¹²Y juc'an chic chupan mismo ruch'abel ri Dios, ri profeta Isaías quire' rutz'iban can:

Ri Isaí xtic'uje' jun riy-rumam
Ri xturubana' gobernar pa quivi' ri man israelitas ta.
Rije' xti'e quic'u'x chi xticoyo'ej ri rusujun rija'.^k

Quiri' nu'ij ri rutz'iban can ri Isaías.

¹³Y ri Dios ri banayon chive chi ivoyo'en-apu ri rusujun, xtu'on ta c'a chive chi tz'akat yixquicot, y chi xti'noj ri uxlanan pan ivánima roma iniman rija', richin quiri' jani na niq'uiy pan ivánima chi ivoyo'en-apu ri rusujun ri Dios, roma ruchuk'a' ri Lok'olaj Espíritu.^l

¹⁴Pero rix aj-Roma ri junan kaniman ri Jesucristo iviq'uin, yin man juba' caca' nuc'u'x chi rix yixtiquer ni'en utz ino'oj chivech, y chi q'uiy iveteman,^m y romari' yixtiquer chic nipaxa'aj-ivi' chivech. ¹⁵Pero c'o ri xc'atzin chi xentz'ibaj-e chive chupan ri vuj re', y man xinjec' ta vi' chutz'ibasic, roma ri Dios ruyo'on ru-favor chuveⁿ ¹⁶richin chi yin

^e 15:5 Ro. 12:16; 1 Co. 1:10. ^f 15:8 Mt. 15:24; Jn. 1:11. ^g 15:8 2 Co. 1:20.

^h 15:9 Sal. 18:49. ⁱ 15:10 Dt. 32:43. ^j 15:11 Sal. 117:1. ^k 15:12 Is. 11:10.

^l 15:13 1 Ts. 1:5. ^m 15:14 1 Co. 8:1. ⁿ 15:15 Ef. 3:7, 8.

rusamajinel ri Jesucristo chiquicojol ri man israelitas ta.^o Quiri' xu'on chuve richin chi pa rubi' ri Dios nintzizoj chique ri utzulaj ruch'abel ri nu'ij achique ruchojmil yecolotaj rije', richin quiri' ye'oc achel jun sipanic jabel oc ri yenjach chuvech ri Dios, jun sipanic ch'ajch'oj banon che roma ri Lok'olaj Espíritu. ¹⁷Roma c'a ri', c'o roma ninya-ka juba' nuk'ij yin ri xa jun nubanon riq'uin ri Cristo Jesús^p pa ruvi' ri samaj nubanon pa rubi' ri Dios. ¹⁸Roma yin xaxe nincovij-vi' chi nintzizoj ri samaj ri yin rucusan-vi-pe^q ri Jesucristo, richin chi ri man israelitas ta niquiya' cánima riq'uin tok niquic'axaj ri nintzizoj, y niqizt'et ri samaj richin ri Dios ¹⁹ri riq'uin nimalaj tak retal ri ruchuk'a' y ri man jun bey etz'eton yebanataj chiquicojol roma ruchuk'a' ri Lok'olaj Espíritu^r richin ri Dios. Y quiri', ronojel lugares ri navil pan abey ri yatel-pe pa tinamit Jerusalem c'a pa roch'ulef Ilírico, ronojel nuyo'on-vi can rutzizoj ri utzulaj ch'abel richin ri Jesucristo ri nu'ij achique ruchojmil yecolotaj ri vinak. ²⁰Y nutijon-pe nuk'ij chutzijosic ri ch'abel ri', man ja ta ri achique lugar c'o chic rutzizoj ri Jesucristo, richin man xaxe nutzekle'en rij rusamaj ri Ajaf ri xa c'o chic ch'aka' quitz'ucun can rutzijosic.^s ²¹Pa ruq'uexel chi quiri', yin nubanon ri ruyuken-ri' riq'uin ri ruch'abel ri Dios ri nu'ij:

Ri achok chique man jun bey yo'on rutzizoj ri Jun ri xtutak-pe ri Dios chucolic ri rutinamit, xtiquetemaj (achique, acu'x) rija'.

Y ri man jun bey quic'axan rutzizoj, (xtik'ax, xtino') chiquivech.^t Quiri' nu'ij ri tz'iban can.

Ri Pablo nuya' pa ránima chi ni'e pa tinamit Roma

²²Y roma jalajoj yin benak-vi chutzijosic ri ruch'abel ri Dios, q'uiy (mul, paj) jari' banayon chi man yin benak ta chi'itz'etic.^u ²³Jac'a ri vacami roma man jun chic tinamit ri man ta nubanon ri samaj chiquicojol, y roma c'o chic chi juna' rurayin ri vánima chi yixentz'eta',^v ²⁴romari', tok xqui'e pa roch'ulef España, ninjo' yixentz'eta-pe pa nubey, y ninrayij chi rix yinito-e riq'uin ri nic'atzin chuve,^w tok xquicot yan can juba' ri vánima iviq'uin chiri'. ²⁵Jac'a ri cami-cami, yi'e pa tinamit Jerusalem richin nenjacha' jun sipanic^x chique ri erichin rutinamit ri Ajaf chiri'. ²⁶Roma ri man israelitas ta ri quiniman ri Jesucristo vave' pa roch'ulef Macedonia y Acaya, xalex pa cánima niquimol jun ofrenda, richin niquitak-e chique ri israelitas ri man jun oc quichajin^y chiquicojol ri erichin rutinamit ri Ajaf pa Jerusalem. ²⁷Can utz vi chi xalex pa cánima chi quiri' niqui'en, roma c'o che'el nika'ij chi rije' achel c'o

^o 15:16 Gá. 2:9; 1 Ti. 2:7. ^p 15:17 Fil. 3:3. ^q 15:18 Hch. 21:19; 2 Co. 3:5.

^r 15:19 Hch. 19:11; 2 Co. 12:12. ^s 15:20 2 Co. 10:15, 16. ^t 15:21 Is. 52:15.

^u 15:22 Ro. 1:13. ^v 15:23 Hch. 19:21; Ro. 1:11. ^w 15:24 Hch. 15:3. ^x 15:25 Hch. 24:17.

^y 15:26 2 Co. 8:1; 9:2.

quic'as quiq'uin ri israelitas. Roma ja ri israelitas xetzijon ruch'abel ri Dios chique richin xecolotaj, y romari', ri man israelitas ta nic'atzin yan chic yequito' juba' riq'uin ri nic'atzin chupan ri quic'aslen choch'udef.^z 28 Y tok nuq'uison chic can ri achique roma yin takon, y nujachon chic can ri sipanic, c'ajari' xquinek'ax-pe iviq'uin chiri' pa Roma pa nubey ri yi'e España. 29 Y yin veteman chi tok xquixentz'eta', rix can xtic'ul más ri favor ri nuya' ri Jesucristo roma iniman ri utzulaj ruch'abel ri nu'ij achique ruchojmil yecolotaj ri vinak.

30 Rix aj-Roma ri junan kaniman ri Jesucristo iviq'uin, roma ja ri Jesucristo ri Kajaf, y roma ri Lok'olaj Espíritu rubanon chike chi nikajoki', romari' ninc'utuj quemelal chive chi riq'uin ronojel ivánima quinito' pan oración,^a 31 richin man yika pa quik'a' ri man quiyo'on ta cánima riq'uin ri Jesucristo^b ri ec'o pa departamento Judea, y chi ri ofrenda ri xtenjacha' chique ri quiniman ri Jesucristo pa tinamit Jerusalem quila' pa Judea, can ta jabel xtiquic'ul, 32 richin quiri' niqicot vánima yixentz'eta', si quiri' nrojo' ri Dios,^c y nic'astan-e juba' ri vánima iviq'uin. 33 Y ri Dios ri Rajaf ri uxlanen richin ri kánima, can ta nic'uje' iviq'uin chi'ivonojel.^d Amén.

Ri Pablo nutak-e qui-saludo ri quiniman ri Jesucristo pa tinamit Roma

16 1 Roma ri vuj re nintak-e iviq'uin, ninjo' chi rix nivetemaj ruvech y utz ruc'ulic ni'en ri xta Febe, jun diaconisa chiquicojol ri niqimol-qui' pa rubi' ri Dios pa tinamit Cencrea.^e 2 Ninjo' chi jabel nic'ul ruvech pa rubi' ri Ajaf tok (napon, nebos) iviq'uin, achel nic'atzin ni'an chique ri erichin rutinamit ri Ajaf. Ninjo' chi rix xtito-pe ri Febe riq'uin ri nic'atzin che; roma rija' eq'uiy eruto'on, y ja jun yin, yin ruto'on.

3 Tibana' saludar ri Priscila junan riq'uin ri rachijil Aquila.^f Rije' junan xkato-ki' quiq'uin pa rusamaj ri Cristo Jesús. 4 Rije' chinucolic yin hasta juba' ma xecamises, y man nuyon ta yin ninya' matiox chique, xa quiri' mismo niq'ui'en conojel ri man israelitas ta ri niqimol-qui' pa rubi' ri Ajaf. 5 Ja jun ri niqimol-qui' pa cacho ri Priscila y ri Aquila,^g que'ibana' saludar. Quiri' mismo ri Epeneto ri na'ey xuya' ránima riq'uin ri Jesucristo pa roch'udef Acaya^h y can ninjo' riq'uin ronojel vánima. 6 Tibana' saludar ri María ri jani na samaj rubanon chi'icojol. 7 Que'ibana' saludar ri ca'i' nuvinak Andrónico y Junias ri junan xojc'uje' quiq'uin pa cárcel. Rije' can c'o quik'ij chiquicojol ri apóstoles y más na'ey quiyo'on cánima riq'uin ri Jesucristo chinuvech yin. 8 Tibana' saludar ri Amplias ri can ninjo' riq'uin ronojel vánima pa rubi' ri Ajaf. 9 Tibana' saludar ri

^z 15:27 1 Co. 9:11; Gá. 6:6. ^a 15:30 2 Co. 1:11. ^b 15:31 2 Ts. 3:2. ^c 15:32 Ro. 1:10.

^d 15:33 2 Co. 13:11; Fil. 4:9. ^e 16:1 Hch. 18:18. ^f 16:3 2 Ti. 4:19. ^g 16:5 1 Co. 16:19.

^h 16:5 1 Co. 16:15.

Urbano ri junan xoj samaj riq'uin pa rusamaj ri Cristo Jesús. Quiri' mismo ri Estaquis, ri can ninjo' riq'uin ronojel vánima. ¹⁰Tibana' saludar ri Apeles ri can utz nitz'etetaj ruc'aslen chirakan ri Jesucristo. Que'ibana' saludar ri ec'o pa racho ri Aristóbulo. ¹¹Tibana' saludar ri jun nuvinak rubinan Herodión, y quiri' mismo ri ec'o pa racho ri Narciso ri xa jun chic quibanon riq'uin ri Ajaf. ¹²Que'ibana' saludar ri Trifena y ri Trifosa ri yesamaj pa rusamaj ri Ajaf. Tibana' saludar ri Pérsida ri can ninjo' riq'uin ronojel vánima, y can q'uiy samaj rubanon pa rusamaj ri Ajaf. ¹³Tibana' saludar ri Rufo ri siq'uisel rubi' chiquicojol ri quiniman ri Jesucristo, y tibana' saludar ri rute', ri can achel ral rubanon chuve yin. ¹⁴Tibana' saludar ri Asíncrito, ri Flegonte, ri Hermas, ri Patrobas, ri Hermes, y ri ch'aka' chic ri quiniman ri Jesucristo ri ec'o quiq'uin. ¹⁵Tibana' saludar ri Filólogo, ri Julia, ri Nereo y ri rana', ri Olimpas y conojel ri erichin ri lok'olaj rutinamit ri Dios ri ec'o quiq'uin. ¹⁶Tibanala' saludar ivi',ⁱ y tic'utu' chivech chi kitzij nijo-ivi'. Tic'ulu' c'a ri saludo ri niqitak-e chive conojel ri niqimol-qui' pa rubi' ri Jesucristo jalajoj tak lugar.

¹⁷Pero riq'uin quemelal nin-ij chive rix ri junan kaniman ri Jesucristo iviq'uin, chi tichajij-ivi' chiquivech ri yebano chive chi man junan ta chic ivánima, y niqui'en chive chi nivil jun roma chi nixutuj can ri Dios, roma niqijal ruvech ri achok riq'uin rix tijon-vi. Naj quixc'uje-vi quiq'uin ri yebano quiri'.^j ¹⁸Roma ri quiri' yebano, mana-ta ri Kajaf Jesucristo uc'uayon quichin, xa ja ri nurayij ri qui-cuerpo. Rije' riq'uin canon tak ch'abel niqisetz quino'oj^k ri man queteman ta achique nuq'uen-pe ri tzij yequic'axaj. ¹⁹Jac'a rix, conojel queteman chi can ninimaj-vi rutzij ri Dios, y romari' yin niqicot ri vánima ivoma. Pero ninjo' chi can ta jabel rix q'ues richin ni'en ri utz, pero can ta achel yixver chuvech ri man utz ta. ²⁰Ri Dios ri niyo'on uxlanan pa tak kánima, cha'anin xtu'on chive chi yixtiquer nixak' che akan ri Satanás.^l Ri ru-favor ri Kajaf Jesucristo xtic'uje' ta c'a iviq'uin.

²¹Ri Timoteo^m ri junan nkusamaj pa rusamaj ri Dios riq'uin, nutak-e i-saludo, quiri' mismo ri Lucio,ⁿ ri Jasón^o y ri Sosípater ri enuvinak.

²²Yin Tercio, ri yitz'iban-e^p rutzij ri Pablo, nintak-e i-saludo pa rubi' ri Ajaf.

²³Jun chic ri nitako-e i-saludo ja ri Gayo,^q ri jabel yin ruc'ulun pa racho vacami, achel nu'on quiq'uin conojel ri quiniman ri Jesucristo ri yepe pa ch'aka' chic tinamit. Jun chic, ja ri Erasto,^r ri nisamajin ruméra ri tinamit, y jun chic ja ri Cuarto, ri junan kaniman ri Jesucristo riq'uin, rije' niqitak-e i-saludo.

ⁱ 16:16 1 P. 5:14. ^j 16:17 1 Co. 5:11; 2 Ts. 3:6; 2 Jn. 10. ^k 16:18 Col. 2:4.

^l 16:20 Gn. 3:15. ^m 16:21 Hch. 16:1. ⁿ 16:21 Hch. 13:1. ^o 16:21 Hch. 17:5.

^p 16:22 1 Co. 16:21. ^q 16:23 1 Co. 1:14. ^r 16:23 Hch. 19:22.

²⁴Ri ru-favor ri Kajaf Jesucristo xtic'uje' ta c'a iviq'uin chi'ivonojel. Amén.

Konojel tikaya' ruk'ij ri Dios

²⁵Tiya' c'a ruk'ij ri Dios ri c'o ruchuk'a' richin nu'on chive chi más yixcovir chirakan, achel rutzijol nin-en tok nintzijoj ri utzulaj ch'abel richin ri Jesucristo ri nu'ij achique ruchojmil yecolotaj ri vinak. Ri ch'abel ri' man can ta eteman-pe roma evan-pe chupan ri ajani tiempo ek'axnak.^s

²⁶Pero vacami c'a juba' tik'alajrises,^t ri quitz'iban can ri profetas ojer. Y achel rupaxa'an ri Dios ri jumul c'o ruc'aslen, vacami najin rutzijosic chique conojel vinak, richin tiquinimaj ri achok riq'uin kayo'on-vi ri kánima. ²⁷Riq'uin c'a ruto'ic ri Jesucristo, jumul tikaya' ruk'ij ri juney Dios ri c'o ronojel no'oj tz'akat riq'uin. Amén.

^s 16:25 Col. 1:26, 27. ^t 16:26 2 Ti. 1:10.